

特 別
^18
4892
18



18
4892
18

明詩綜卷四十八

小長蘆 朱彝尊 錄

安宜 張易汙 緝評

徐獻忠 一首

獻忠字伯臣松江華亭人嘉靖乙酉舉人知奉化縣及卒友人私謚曰貞憲先生有長谷集

靜志居詩話長谷以作者自期持論謂詩人之作代出意近以增前人之能旨哉言也其比六朝聲偶品唐詩原樂府皆有功後學惜其書不盛行詩亦冲澹無累句特少警拔耳

俞氏水樓

故人江樓月照見千里心遊子未言歸清光被滿襟西陵隱簷際南湖澄夕陰持杯向木末捲幔對遙岑悵然



不能去徒令江水深

沈燭一首

燭字世明一字伯遠嘉善人嘉靖乙酉舉人有石聯遺橐

送顧梧石之衡州

瀟江路轉千峰碧冉冉蒼雲拂樹低此去臨風憶回首月明江上鷓鴣啼

顧聞二首

聞字行之吳縣人嘉靖戊子舉人自號九巖山人

岳東伯云九巖才華瑋麗鋪敘豐長究其所歸靡不有自至於梁翰人稱其能並美者矣

折楊柳

芳艸接金隄垂楊綠更齊夕絮離天遠春絲別霧迷曲中青鏡改愁畔紫騮嘶紅樓歎少婦腸斷玉關西

夜泊崔鎮聞笛

雲落清河夜天橫片月涼江樓莫吹笛明目是山陽

孫宜十首

宜字仲可華容人嘉靖戊子舉人有洞庭漁人集

顧言云漁人新聲奇調在李唐二孟之間河嶽隱淪之夏秀者錢受之云洞庭漁人詩多至三千八百餘首王元美評云華容

孫宜得杜尚余觀其詩則擬字句了無意味求杜之片鱗也不可得而况尚乎

詩話洞庭漁人胡氏詩數稱其學杜然實源於大李故論詩絕句云我愛風流太白豪萬言珠玉在揮毫特其運筆癡重斯與謫仙人不類耳其於空同大復少谷太初迪功西原皆其所取法滔滔莽莽下筆不休亦楚產之傑出者

十三夜月

良晤既匪易佳節亦復過今夕非昨夕光景忽已多霏
霏失玄霧濫濫增金波昔眇猶室隅茲升眇庭柯當扉
萬象啓側戶三星羅蕭爽候愈寂沉冥夜如何興言悅
至賞眷此成清歌

十四夜月

循環廼常度盈昃亦至理幾望已在茲持盈有深旨天
運恒自然人事安足恃未滿溢漸形欲盛衰伊始倚伏
本貞機損益妙良軌志以道自虛情緣欲斯侈守義焉
所窮法乾信云美

送周氏

黃河逾東逝白日淹西沉人生不滿百奈此世慮侵貧

賤豈得渝富貴安可欽浮榮竟杳漠要路恒崎嶇邵侯
悅瓜田陶令謝華簪達觀信有及古道良足箴得喪匪
人爲憂樂由我心願言返初服聆我山水音

菱港

結軫倦久疴嚴裝理前遊山行稍云疲水宿良所由弭
櫂臨別浦揚舲逝安流波迴路曲折雲霽天沉浮霜荻
響近渚風篠鳴長洲沙翔去來驚岸並連拳鷗澤蘭晚
漸垂江菼秋始柔遵嶼乍離合凌巖屢優游擊楫情已
乖乘桴興將倅即此締暹盟抽詞贈同舟

行視別業禾稼作

徇祿返塵軌臥疴遂幽垆爲圃竟不習學稼鮮所明薄

田委僮僕嬾性謝經營春陽始云改夏序亦以征輟翰
越城棲振衣事郊行旣暢景物麗復感禾黍盈雲葉被
畛秀風花覆阡平修渠濯細流佳實播初馨堅好類周
穡耗蠹殊魯螟利婦足遺穗築塲喜新晴澤黍我私及
秋荷今歲成麤糲甘自嘗飽煖奚更營且免洛陽歎聊
結杜曲盟

王生入山謝事戲簡

疾風吹雲暗江縣東城之雷北城電城中一雨絕可憐
十日不見王生面昨當折簡傳深意咫尺山城爾須至
楊雄艸玄亦避人侯葩載酒曾多事

秋日歌

二首

秋風忽吹洞庭艸萬壑千崖覺秋早江邊白石迴波濤
湖上蒼雲亂昏曉少年日月易搖落即日繁華已枯槁
人事天時合併催風塵何必長安道
秋風淅淅吹茅屋東流之水西日速地連南極北極雲
葉落千山萬山木江上漁人罷釣歸臨風拋擲綠荷衣
黃塵碧海真漂泊白石滄波誰是非

同諸友遊郭曲

地勝因湖得堂幽對野開晚風吹笛起秋水抱城迴溪
友留魚去鄰翁送酒來爲言九日近引客試登臺

十三夜月東謝子

今夕江樓月能添昨夜明苑雲寒自斂城角霽尤清露

警花間雀風微樹杪螢百壺高興在端坐待君傾

陳津五首

津字道通長洲人嘉靖戊子舉人仕至兵部職
方郎中有莪齋集

詠史

貧賤希富貴富貴履危機赫赫丹徒子當樞思布衣五
鼎有覆餗一瓢堪樂飢可知東門犬不若西山薇火烈
飛蛾焦泉深鯉魚肥胡為即顛越而不鑒於微不見成
連子千載揚音徽

怨詞

明妃絕世姿少長君王側一忤丹青人咫尺成離隔何

况窮居士欲望君王識

石山驛

四野動力作荷鋤紛出村開塍望新沃喜見前山昏嵐
氣藹林杪春風揺艸根丘中有來信燕子入衡門

螢

分將光自照肯擬暗中投寂歷依書幌分明點客舟露
涼深映竹風定直衝樓不恨飄零晚終隨大火流

陸冰修云五六

清磬

燕子磯

燕子何年集釣磯春氣不見舊烏衣空餘芳艸迷前浦
長自寒潮送落暉刺眼野桃臨岸發多情山鳥傍人飛

獨慚白髮紅塵客此日披襟對翠微

鄧遷一首

遷閩縣人嘉靖戊子舉人官嘉興通判

感秋

白露下亭皋涼風吹綺陌一夕芙蓉花紅芳變瑤碧

包桐一首

桐字子同號同谷鄆縣人嘉靖戊子舉人官知

縣

送屠秋官國望復任留都

寒江渺渺煙霞開揚舲西指鳳凰臺大夫十年不得調
風塵千里胡為哉銜杯欲別別最苦拔劍當歌歌莫哀

璧水貫城當咫尺相逢還許坐莓苔

黃省曾一首

省曾字勉之吳縣人嘉靖辛卯舉人有五岳山

人集

皇甫子循云勉之思劇沉幽語罕仍襲宿構非工食時為敏

徐紹卿云勉之才藻富捷篤尚深華徐子元云勉之詩宗六

朝如空江月明獨鶴夜警王元美云黃勉之如假山池雖爾華整大

費人力穆敬甫云山人從空同遊刻意為詩遂成一家岳東伯云

江南曲

旖旎綠楊樓儂傍秦淮住朝朝見潮生暮暮見潮去

史元中一首

元中號鹿泉鄆縣人嘉靖辛卯舉人魚臺知縣

有青蓮集

詩話鹿泉知魚臺縣事值歲大侵盜賊起有簡瑞者為盜魁善運稍馳馬出沒官道鹿泉以計縛之簡臥庭下瞠目曰吾左手持稍右短兵橫行千里間今為書生掩取天也公笑曰汝輕書生耶即起著短衣持其所用稍運之左右迴旋如舞匹練忽稍斷為三擲示簡曰汝稍豈足用耶簡叩頭稱死罪乃繫之獄至冬月將論決簡求見公曰身亦山東男子不該負公乞假十日一生別老母公即縱之去眾皆懼及期先一日簡就獄離魚臺三十里為獨山大盜劉儀久嘯聚其中有眾數千開府曾公銑議進剿以公為前鋒既擇日陳兵禡祭畢公知獨山有謀者在軍乃命植一竿百步外公手挾矢誓曰某以書生任將兵若一舉滅賊當三天中此竿時萬目齊注監司諸將俱色變公從容三發三中呼譟震地是日公即察得謀者三人釋其縛賜以美酒食笑謂曰汝來觀吾射耶謀者鼓栗盡吐賊虛實及所入獨山徑道公立提兵襲其寨擒劉儀還曾公大喜方論薦公會曾公遷制三邊尋為相嵩所害赴市鹿泉歎曰事尚可為耶即日挂冠歸里時年四十二家居復四十年守令思一造見不可得老益負惟賣文以自給云

秋思

世事吟邊改流光醉裏過歲收頻下下公賦益多多有

暇窮漁獵無憂隱薜蘿康衢終見及擊壤續堯歌

林垠 一首

垠字天宇閩縣人嘉靖辛卯舉人選授桂陽知州遷撫州同知終戶部員外郎有野橋集

拒馬河作

拒馬河邊驛路長蜚狐口外又斜陽春光已過六十日
不見花枝空斷腸

唐 鉞 一首

鉞字君錫蘭溪人嘉靖辛卯舉人任揚州府同知陞楚府左長史

江行

客計方歸越，征橈更背吳。風螢臨水亂，江月向人孤。洲已過，迷子山行及望夫。可憐清夜色，強半在長途。

黃中 二首

中字文卿，處州人。

蘭臺法警錄作遂安人，浙士登科考同。

嘉靖辛卯舉人。

授鉛山知縣，擢貴州道御史，出為山東按察副。

使有南窗紀寤集。

田叔禾云：括蒼詩派倡自郁離子，自郁離子歿，作者無聞。嘉靖中有黃西野出焉，可

當作者。李時遠云：副使為詩不泥法度，不主故常，冲融渾化，意境兩忘，識者謂其衆體皆備。

長相思 二首

妾夢一處所，積雪滿空山。覺來向人語，道是玉門關。萬里傳郎信，開緘喜欲狂。報得郎身健，遲歸亦不妨。

久雨

河東早秋風已涼，况乃陰雨難禁當。客子衝泥出門望，蓬蒿滿徑如人長。翻飛紫燕不妨濕，婀娜黃花今漸香。歸來獨酌對山色，圓笠依然戴石郎。

強仕 三首

仕字甫登，無錫人。嘉靖辛卯舉人，選授江西廣

昌知縣，遷知德州。有考槃寤歌綺膳集。

咏向長

子平謝累辟，雅志在隱居。乏食或有饋，取足反其餘。讀易深自悟，人世等蘧廬。謂貧富不及，謂賤貴不如。勅言婚嫁畢，家事無關余。同好有禽生，肆意相與娛。五嶽游躅徧，高風映簡書。

咏王霸

儒仲有清節始亦赴徵命造廷抗高辭不肯臣萬乘歸
來事躬耕蓬藿掩門逕翩翩故人子相過容服盛一念
兒曹羞客去臥不應賴有賢婦言不失初守正嘉遯遂
終身清輝兩相映

咏梁鴻

伯鸞古賢人乃在杵臼間夫婦共守志逃名入深山淒
涼五噫歌東出辟帝闈齊魯復荆吳長往遂不還為傭
豈無勞顧已少外患終葬烈士旁高風邈難攀

劉成穆一首

成穆一名嘉壽字玄倩又字文孫崇慶人嘉靖

辛卯舉人有劉玄倩集

朱秉器云玄倩詩文初不經意即席揮灑頗有佳者

詩話孝廉過漢武帝陵詩云歲暮霜殘過漢都武皇陵墓舊荒蕪不將玉匣藏天馬猶使金燈照野狐賦客詞園清露盡仙翁丹竈白雲孤千年唯有秋風曲渭水長流啼夜烏楊用修見而甚愛之然按其字句尚欠帖妥故置不錄

城南送友

送汝歸南國燕山正早秋獨傷千里別同憶五陵游漢
殿相如賦吳江范蠡舟相思同易水日夜自悠悠

高應冕四首

應冕字文中仁和人嘉靖甲午舉人官光州知

州有光州詩選

顧玄言云文中材致清膽聲調適接平平寫出亦自沉淨

江上行

白日江上沒江雲滿滄洲鷗鳥各隨群煙波何悠悠還

將不繫心送君千里舟相思不相見極目令人愁

同張玄洲胡圓洲王曉山張元洲項芳溪江樓觀

潮分韻

江聲秋益壯江艸秋還歇夫差自亡吳子胥何怒越盤
盤江上山盈盈江頭月此景亘千古不逐浮雲沒

江村晚眺

荒村沉夕照煙樹幾人家野渡迎潮急寒山帶月斜漁
歸無遠市鴈下有平沙寂寂秋江晚芙蓉自落花

渡湘江有感

扁舟復何去五月下瀟湘遙望蒼梧迥還憐楚水長暮
潮下野渡遠樹帶殘陽渺渺雲山外蒼茫隔故鄉

陳芹 三首

芹字子野系出交南國王永樂中避黎氏之亂
來奔遂家南京中嘉靖甲午舉人六試禮部不
第謁選知奉新縣調簡得寧鄉之官九十日謝

病歸結青溪社有陳子野集

錢受之云子野才情警敏
醉墨寫竹枝欹斜盡致文

徵仲戒門下士往南京慎勿画竹彼中有人也少嘗夢入深山石梁跨
道瀑布灑空洞中二老僧趺坐周繞木闌以防虎後遊天台山洞宛如
夢中木闌猶在問之土人云老僧化去久矣自是恍然省悟專精內典
作和寒山子詩別業近新林浦是謝元暉題詩處又於桃葉淮清之間
起邀笛閣延一時勝流結青溪社每月為集遇景命題即席分韻金陵
文酒觴咏之席於斯為盛相延五十年流風未艾承平盛事至今人豔
稱之長年市兒
猶能指點其處

詩話虞山錢氏序金陵社集詩云海宇承平陪京佳麗仕宦者跨為仙
都游談者指為樂土弘正之間顧華玉王欽佩以文章立壇陳大聲徐
子仁以詞曲擅場江山妍淑士女清華才俊歛集風流弘長嘉靖中年
朱子价何元朗為寓公金在衡盛仲交為地主皇甫子循黃淳父之流

為旅人相與授簡分題徵歌選勝秦淮一曲煙水競其風華桃葉諸姬
梅柳滋其妍翠此金陵之初盛也萬曆初年陳寧鄉芹解組石城卜居
笛步置驛邀賓復修青溪之社於是在衡仲交以舊老而蒞盟幼于百
穀以勝流而至此歌後軒車紛還唱和頗煩雖詞章未爛大雅而盤游
無已太康此金陵之再盛也其後二十餘年閩人曹學佺能始廻翔棘
寺游宴冶城賓朋過從名勝延眺縉紳則臧晉叔陳德遠為着日布衣
則吳非熊吳允兆柳陳父盛太古為領袖臺城懷古爰為憑弔之篇新
亭送客亦有傷離之作筆墨橫飛篇帙騰涌此金陵之極盛也戊子中
秋余以銀璫隙日采詩舊京得金陵社集詩一編蓋曹氏門客所撰集
也嗟夫日中月滿物換星移舟壑夜趨飲獵旦改白門有烏無樹枝之
可繞華表歸鶴悵城郭之併非撰文懷人吁其悲矣謂我何求亦無曹
馬覽其文者謂淋漓盡致感衰今昔之感具於是矣然錢氏攷之未得
其詳青溪社集倡自隆慶辛未而非萬曆初年也未乘器停雲小志云
青溪自後湖分流與秦淮合當桃葉淮清之間有邀笛步者晉王徽之
邀桓伊吹笛處也陳明府芹即其地為習焉俯瞰溪流頗有幽致歲辛
未費參軍懋謙約余為詩會其上於是地主則明府次則唐太學資賢
姚典客湖胡民部世祥華廣文復初鍾參軍倬黃參軍喬棟周山人
甫盛貢士時泰任參軍夢榛先後游而未入會者則張太學獻翼金山
人鸞黃山人孔昭梅文學鼎祚莫山人公遠王山人寅黃進士雲龍夏
山人曰瑚紀亳州振東陳將軍經翰汪山人顯節汪文學道貫道會沈
太史懋學程文學應魁周文學時復癸酉復為續會則吳文學于玉魏
廣文學禮莫貢士是龍邵太學應魁張文學文柱每月為集遇景命題

即席分韻同心投分樂志忘形間事校評期臻雅道前會錄詩若干刻
之命曰青溪社稿許石城先生敘其首續會錄詩若干吳瑞穀序之會
余領渝郡符任參軍入與都稿遂散逸後方民部沆葉山人之芳入焉
余馳書社中期稍收輯無何胡民部費參軍以註設謫黃參軍以領郡
行已方戶部亦因事出盛會不常良朋星散回首江東雲樹在望秦淮
煙月黯爾銷魂因記舊游略次其姓氏篇什如左按此青溪社集之本
末始備錢氏止觀曹氏門客
撰本而未見乘器小志故也

折欄會和周銀臺韻

新歲詩家集深更興未闌共憐今夜月仍似去年看社
主歡扳轄車徒怨折欄綵梅紅對酒忘却外邊寒

秦淮煙月

秦淮煙暝水長流明月空懸萬古愁春去秋來風景別
鳴箏夜夜酒家樓

聞笛有懷朱比部

空林寂寞雨絲絲折得梅花未滿枝正值鄰家夜吹笛
倚闌無限故人思

王 鑛 二首

鑛字公范閩縣人嘉靖甲午舉人官思明府同
知有治山拙橐

送大行謝驛梅使琉球

使節分星象仙舟捧御函絲綸宣海嶽天地極東南服
荷殊宣賜才推絕域堪遠人胥樂附異俗乃能諳父老
相如檄詩書陸賈談徵牢宵踰十館穀日過三牛馬風
何隔金銀氣不貪兩階遐格舜九扈乍聞鄭專對名非
忝周咨迹豈慚歸航應載石赴闕及傳柑國體從茲振
兵威不自戡梅花洋信近延竚慰朋簪

青魚灘

青魚灘上野人家曲徑疎籬長物華漠漠午煙吹不散
鷓鴣飛出木棉花

薛 欽 二首

欽字寅甫懷安人嘉靖甲午舉人太平儒學教
諭有東山集

詩話薛君詩頗清越近於皆山樵者曹能始序徐惟和詩云聞自林
膳部後百餘年而得鄭考功又數十年而得薛博士其推重若是

句容道中望茅山

翠嶺盤江甸遙天紫翠分風塵應不到鸞鶴自為羣曉
徑連青靄秋山徧白雲可憐句曲望不見華陽君

雞鳴寺

古寺浮仙嶂層甍近帝家洞香流石乳僧午飯胡麻金
刹盤飛鶴丹池聚浴鴉俄聞孤磬發蕭颯滿煙霞

郁蘭一首

蘭字文芳秀水人嘉靖甲午舉人官南京刑部
主事有比部橐

詩話嘉靖倭亂胡總制宗憲有捍患功及被逮繫陽川時如績溪縣事
力覆護之至以去就爭願上印綬始得免羅織可謂長者今嶺南之士
知其名者寡矣矧詩乎

讀五代史

天地沉冥際山河戰伐中可憐長樂老只是愛三公

吳節一首

節字子甘江陰人嘉靖甲午舉人任江西新昌
知縣

登仙阜亭

仙阜孤亭敞憑高發興新風帆斜入浦雲樹曲通津丹
井迷芳艸清池覆綠蘋月明歸去近涼影忽隨人

陳紹文一首

紹文南海人嘉靖丁酉舉人官通判

幾日南巡詔旋看下九霄五花邊將馬七葉禁臣貂帝
子馳金輅神人駕石橋康衢應有頌誰為采風謠

吳旦一首

旦字而待南海人嘉靖丁酉舉人謁選為知州

有蘭皋集

詩話蘭皋南園後五先生之一也惜其集不傳

秋夕城闌納涼

同游冠蓋晚相招澤國山川正
次寥官閣迥臨秦代壘
女墻斜帶越江潮流螢艸細
風先動繞鵲枝長露易飄
多少高樓人不寐碧天涼
月夜吹簫

蔡宗堯

一首

宗堯臨海人自號東郭子嘉靖丁酉舉人選授
松陵教諭有龜陵集

麗情曲

曲房過雨蕙徑空綠雲藹藹懷春風
欹枕牙床睡初醒

胭脂汗濕羅衣紅鴛鴦牽繡絲未歇
流蘇夜煖斜明月
珠簾半卷春日高海棠飛起雙蝴蝶

鍾廣漢云八義遺響

方效

一首

效字去病桐城人嘉靖丁酉舉人有石洲集

歸途

大龍之嶺高插天石塘湖邊秋可憐
稻花菊花裛寒露
遠壑近壑屯晴煙江聲激壯自今古
峽徑縈紆還歲年
悠然獨馬渡河去日暮滄洲停客船

郭文涓

二首

文涓字穉源古田人嘉靖丁酉舉人官保寧同
知有亭集

遊西山

緬維京國遊夙憶西山勝前期戒朋儕昧爽理征鐙連
鑣出都門散轡遵郊徑厓猶望晴巒迢遞陟煙磴蒼茫
紫翠分參差金碧映雲際鬱層臺風中發孤磬山光足
怡愉池色湛清澗覺花粲奇馨慧艸紛延亘梵影空中
懸經聲榻前聽行恐苔痕穿嘯聞谷響應翠巘屢攀躋
朱闌恒眺凭取適情易酬息機意初稱登臨愜賞懷攬
結動幽興聊茲却喧囂庶以慰蹭蹬

夜懷

疎燈孤館寂落木萬山空夜色誰家月秋聲何樹風鄉
園歸鴈外身世轉蓬中祇益離羣意淒然思不窮

劉

熠一首

熠字元麗號東沙海鹽人嘉靖庚子舉人官監
察御史有同春堂遺藁

山中風雨

春來風雨倍淒淒咫尺雲峰萬木迷竈下濕煙離突起
庭前幽艸上堦齊夢來旅况殊鄉國聽去江城盡鼓鼙
縱擬單車待明發子規聲已遍前溪

方興邦

一首

興邦字懋翼莆田人嘉靖庚子舉人官至廣西
叅議有喬村集

得子相書

尺素中宵慰索居美人南國意何如江淮殺氣昏牛斗
豺虎烽煙蹙羽書天入蒹葭孤鴈盡秋來風雨五陵疎
朱門鳴瑟誰知己莫漫逢人賦子虛

許邦才

玉首

邦才字殿卿歷城人嘉靖癸卯舉省試第一任

永寧知州遷德府長史有海右梁園二集

魯藩中立云空

石詩傲于鱗而氣格不逮然于鱗詩多空而石溫厚或過之謝
茂秦云殿卿軒軒豪舉傍若無人宋韓文云于鱗亟稱殿卿其梁園
集殊不稱絕

句差快意

詩話殿卿如銳頭年少騁獵平原耳後生風鼻頭出火長歌有云長卿
慕人千載前何似與君俱少年子雲慕人千載後何似與君俱白首英
氣殊倫令張正言為之不過此也王元美贈詩云是時歷下李攀龍往
住道汝文章伯少應言評詩竟不之及又夷之四十子之列取舍似未
也公

寄懷元美

鴻鴈驚秋海上還片雲孤月薊門關如何昨夜西窗夢
不道千山與萬山

送高都護入賀

將軍白馬插雕弧自傍屬車誇射鳥陛下聖明三萬歲
微臣直至執金吾

送謝中丞歸射洪

二首

六月江干冰雪涼射洪春酒鬱金香自從筇竹通西夏
漢使年年出夜郎
巫峽江陵一水分猿聲兩岸夜成羣遙知月下孤臣淚
才過三聲不可聞

留別劉公

秋風長缺幸生還
明日孤臣入楚關
莫道三年人萬里
天涯消得幾重山

韓詩一首

詩字承志長洲人嘉靖癸卯舉人知永豐縣遷雷州府同知有勗齋詩集

小齋即事

小齋寂歷似山居
池上逍遙與世疎
盡日不通門客刺
經春嬾報故人書
捎簷細竹含風響
繞榻輕雲過水虛
願得郡中無一事
十年不調更何如

戎來賓一首

來賓先名國振字孔塘鄞縣人嘉靖癸卯舉人榜後更今名官南昌府通判

郊居即事

作吏才偏拙為園意頗深
風塵元畏路山水是知音
徑曲叢篁密堂虛澹月侵
平生甘放浪自合蚤抽簪

梁柱臣一首

柱臣字彥國廣州順德人嘉靖丙午舉人官灤州知州入為刑部員外有梁彥國存橐

寄懷蘇雲谷逸士

吾鄉隱君子質素古人風
性豈琴書癖身將猿鶴同
捲簾山閣暮策杖海雲空
一別麻源谷相思挂樹叢

陳所有 一首

所有字彥冲莆田人嘉靖丙午舉人合浦知縣

艸堂

艸堂在西林露頂避溽暑客來剝啄聲葛巾不知處

孫樓 一首

樓字子虛嘗熟人嘉靖丙午舉人湖州推官有

百川集

郊西詩

上苑春偏麗西郊更可憐輕塵花半妥斜陌柳初眠綠
樹鶯聲外青山馬首前夕陽南北旋彷彿太湖田

邵圭潔 一首


圭潔字伯如一字茂齊嘗熟人嘉靖己酉舉人

有北虞集

蘇臺竹枝詞

魚尾晴霞片片明鴨頭新水半塘生平川蕩槩一十里
深巷賣花三五聲

黃尚質 二首

尚質號  餘姚人嘉靖己酉舉人知息縣事

遷知景州有青園錄

再過半山堂

春風重過半山堂依舊千峰入坐蒼更有好花明後院
旋添新竹蔭虛廊画圖想像摹雲谷詩句模糊認雨墻

却怪山禽似相識向余啼上臥龍岡

采茶女

結束烏椎髻攜筐去采茶歸逢鄰女笑也插杜鵑花

葉春及八首

春及字化甫歸善人嘉靖壬子舉人選授福清

儒學教諭陞惠安知縣遷興國知州轉鄖陽同

知召為戶部郎中有網齋集

詩話歐陽永叔日本刀歌云徐福行時書未焚逸書百篇今尚存令嚴不許傳中國舉世無人識古文永叔雖有是言亦詩人托興而已故葉少蘊馬翔仲均疑之鄭麟趾高麗史宣宗八年五月李資義還自宋奏云帝聞吾國書籍多好本命館伴書所求書目錄授之且曰雖有卷第不足者亦須傳寫附來日錄首開百篇尚書而高麗未之有也先是咸平中日本僧奝然以鄭康成注孝經來獻不言有尚書王渾中堂事紀載中統二年高麗世子植來朝宴於中書省問曰傳聞汝邦有古文尚書答曰與中國書不殊然則百篇尚書高麗且無之况日本乎萬曆初

網齋在郎署有命遣使臣封侯網齋上言請多方索之以歸未免近於迂矣網齋令惠安幾與姑臧葉燕比黎有繡衣按郡經縣治騎從過盛將止宿焉網齋前曰日未可安小縣豈容駐節乎強之去強項甚矣及解組歸隱居羅浮之石洞吟詠自適雖以講學開詩宗杜陵不墮程邵門

飲陳吳卿宅即席賦得帝字

黃公避秦皇子陵傲漢帝萬乘彼不榮五斗吾何利邇來脫桎梏麩葉聊避世田父尚不辭况乃夙同志高堂敞華筵上客縱橫至日暮飲未休舍坐還席地屢舞倩人扶懽言答賓戲因思劉參軍荷鍤有深意

飛雲頂

峰到飛雲絕晴看赤日沉露凝霜鬢白龍起二儀深積氣連吳楚啼猿自古今天門知不遠乘興欲登臨

小砢石臺

倚劒孤城暮登臨萬壑秋潮平沙岸失月落島煙浮白
鹿通夸國黃雲滿戍樓南征斷消息橫吹不勝愁

訪詹咫亭先生巢雲書院兼呈社中諸友

二首

巢雲高不極飛閣倚雲開樹杪滄溟盡尊前紫翠來江
湖雙涕淚天地此樓臺縱有終焉計能忘國士才
惆悵出門去徘徊流水間菊花深復泛桂樹晚重攀返
照孤城斂寒雲大壑還明朝羈物役清夢到柴關

白雲洞口號

二首

洞晚雲隨入巖秋雨自飛莫愁露野席猶得浣塵衣歲
月吾將老煙霞興不違昔年招隱處叢桂可同歸

古洞何年闢長留宿白雲江山千里盡風雨半天聞芝
朮堪時往壺觴到夜分依依乘月去猿鶴惜離羣

初春滕方伯支學憲招飲藥洲藥洲南漢離宮有
池今名白蓮池畔有九曜石

留客平原飲賢哉二大夫致身霄漢近傾蓋古今無冀
北空良驥關西得舊儒偶然山澤叟今夕一尊俱

張鳴鳳

一首

鳴鳳字羽王豐城人嘉靖壬子舉人選授府通
判

留別黃門周公

清時落拓媿無能何事高人獨見稱朝議遽寬重謹吏

聖恩因借六安丞雲山曙色催行李秋渚離心醉采菱
夢裏亦知雙闕路幾回深夜悵殘燈

陳師一首

師字思貞錢塘人嘉靖壬子舉人有復生子橐

潞河舟中作

夾岸垂楊青可憐出門仍是葛衣天鄉書不到東吳鴈
客夢重尋潞水船季子貂裘重那敝王喬鳧舄幾時旋
年來作客渾南北囊底曾無貫酒錢

吳景明一首

景明字復陽休寧人嘉靖壬子舉人知州有西

洲集

赴西州任道中即事

灘險飛流急林深毒霧遮溪行朝避蜮山宿夜妨蛇屋
帟枕榔樹籬編茉莉花從知邊徼地風土異中華

姚光虞一首

光虞南海人嘉靖乙卯舉人官至知府

送周國雍守順慶

使君千騎擁朱幡此去誰云蜀道難列郡分符虞岳牧
前驅負弩漢衣冠湓城月色揚舲渡巫峽濤聲倚劔看
行矣外臺今不薄循良卿相滿長安

鄧元錫六首

元錫字汝極建昌新城人嘉靖乙卯舉人徵授

翰林院待詔學者私謚文統先生有潛學橐

擬古

人皆願延年延年欲奚為一夕復一朝忽與百歲期誰
能繫西日長挂扶桑枝羣流赴巨壑寧復有還時劉安
將雞犬八公徒愕眙秦皇與漢武但為方士嗤

雜言別傅陳二友

羲娥無停轂青陽忽朱明柔條奮翹柯原隰何青青往
者日以徂來者日以榮嗟余至寡劣晞聖徒有營邁往
信不力逾覺時序傾我身所以立豈不恃友生奈何同
心侶中道各有程戚戚增紆思薄言寄深情

古詩送王子仁

噓物寧非風風勁物乃戕駕車寧非馬馬疾車以僵百
獸伏騶虞衆禽景鸞鳳豈無鷹隼姿搏鷲難為良

別江子

良農程歲功豐凶非所諳良賈經儲積利鈍皆所甘曾
以水旱故棄捐任與負曾以貿易薄棄捐絲與布十年
經世業料理亦有素奈何乘軒輶中逵思改駑人生各
有職治職各以勤永誦蟋蟀篇愾然念先民

初夏登眺天峰

江城開宿雨孤嶠共躋攀龍氣留蒼壁鶯聲響碧灣危
峰斜帶郭幽徑曲盤山不淺東林興迢迢未忍還

途中雜詩

河水走平土郡邑何偏側君莫問河防河防無上策

周式南一首

式南字仲翰吳江人嘉靖戊午舉人以孫宗建
貴贈太僕寺卿

萬松巖

為愛山幽選勝來城南絕巘翠屏開澗邊黃葉自秋色
門外落花空古臺松影半分禪榻靜潮聲一道海門回
聖朝欣覩平夷頌欲賦長楊媿不才

劉魁一首

魁字煥吾泰和人由舉人選授寶慶通判移知
鈞州遷潮州府同知入為工部員外郎諫徒雷

壇廷杖繫詔獄者再以宮禁火赦還有晴川集

詩話永陵好道詔徒雷壇於禁中曰雷霆洪應之殿有壇有城有雷
軒有嘯風嘘雪靈雨耀電之室有清一齋有寶淵門有靈安精營輔國
演妙之堂有八聖居有馭仙次各懸以額又別建凝道雷軒帝晝日常
御之其始作也晴川疏請停止帝怒予杖繫獄與楊伯脩周順之講學
因園中是年八月西苑神降于此請宥三臣乃得釋俄復逮繫明年宮
禁火放還晴川陽明弟子也郡人鄒公元標合三人詩刊之題曰三忠
選文

過德州次訥溪韻寄斛山

纔過滄州又德州綠楊堤岸菊花秋未論秦楚萬餘里
且共風波一葉舟農圃漁樵俱是侶江湖廊廟敢忘憂
獨憐胛脚差還健有約同登華岳遊

張燾四首

燾字水波南昌人由舉人仕至府同知有崇古

堂豪

先鋒樓

噫嘆哉延城之山高兮天際頭况此城上更架百尺先
鋒樓登樓一望覽無際但見萬里蜃氣滾滾直與蒼天
浮三峰九溪不暇數時有倭雲刺日出没亂我雙吟眸
憶昔使君提兵駐此地雄據八郡當襟喉生靈百萬賴
保障勞集不讓高密侯爾來兵力日綿薄肉食誰為天
王謀向來鄰郊有小警遂使五嶺欲撼杉關愁噫嘆哉
粵山如昨粵水流壯士一去天悠悠東南徭獠尚可語
西北烽煙誠足憂去年胡馬下井陘遂使烽火通幽州
令人拊髀歎不已投筆每為班生羞安得使君溪前仗
劍起直走塞下一鼓甲士皆貔貅漠南河西羌種盡擊
滅從此玉門遣戍空防秋

秋思
二首

本朝宣大屹秦關北轉河戎部落間魏闕頻看優詔下
玉門誰唱凱歌還黃沙鼓角野狐嶺白日羊駝天馬山
節鉞不來楊石遠蚤秋烽火照愁顏
中原舊服緣河套百戰翻成縮內邊空使健兒遺白骨
不聞中帥給青錢六羸徑入榆林寨衆鴿橫飛好水川
安得征西班節使坐收氐海淨狼煙

康山忠臣廟

高王卷甲南征日掃蕩亡陳向此洲焚炬未應誇勝算

覆巢原已畫先籌江東父老空憐楚垓下山河盡屬劉
寂寞康山湖上廟至今煙雨不堪秋

李

蔭一首

蔭字襲美內鄉人官刑部主事有五遊集

雪霽登雲門山

晴雲落澗春水鳴好風吹人衣袂輕有山如此不一醉
啼鳥可憐空數聲碧石崔嵬跨絕壑白雲爛熳連孤城
楚客興來每獨往浩歌不減昇天行

張邦伊

一首

邦伊字孺覺鄆縣人以父時徹廕仕至陝西苑

馬少卿

沈嘉則有三楚之遊席上得分字

春城斗酒惜離羣把袂高歌到夕曛地入衡廬三楚盡
天迴襄漢九江分停舟夜聽湘靈瑟倚閣朝寒鄂渚雲
知爾尚平家累淺逢人勝事好相聞

仲春龍

一首

春龍字原仁秀水人以太學生選授文淵閣中
書舍人有九山樵子集

少年行

鏤金鞍子百花裝三尺流虹飲血光白日報仇官市上
青春調笑酒壚傍

潘

緯

一首

緯字仲文一字象安歙縣人入貲為武英殿中書有養疴遊淮園居諸集

王仲房云仲文年少攻詩不甘嘗調雖羽翼方翔而風力厚負

閭門尋周公瑕王和仲所居不得

閭門九陌通車馬往來逢入郭尋舊識望閭迷舊踪空
停秋江棹漫聽寒山鐘相隔城闌裏煙雲凡幾重

項元淇一首

元淇字子瞻秀水人光祿署丞有少岳山人集

皇甫子循云子瞻古選冲

逸五言典雅七言清婉

同陳白陽登閣

月宇臨清桂星筵拂絳河已投車轄飲兼倒接離歌砧
杵催秋急風煙向晚多春波門外路乘興數經過

周

錫二首

錫字子純太倉人嘉靖中以薦授潮州府通判

有南游東山蒹葭得已諸集

詩話子純下筆不休間有合作相傳攝潮陽縣印巨寇楊三搃林大帥率黨千人駕三十艘壓境警報踵至子純徐曰鼠輩爾胡能為眾皆懼子純挾弓矢上馬引滿射三發三中的桴鼓應之擊走三搃擒大帥以歸縣境以寧洵豪士也

海豐道中

長夏苦于役炎風吹鼓鼙山深榕子落雨急鷓鴣啼野
渡從流下斜陽在竹西極知行路險愁殺嶺雲低

茅屋

茅屋自成趣况丁離亂中敲冰兩孺子曝背一衰翁客
至村醪薄樵歸樹葉空三江十萬戶安樂幾人同

吳門夜泊

谷口揚帆風正急野亭雲木雨霏霏晚來城郭維舟穩
老去湖山見面稀十里煙光開疊嶂兩崖樓閣帶斜暉
夜深欲傍寒山寺依舊鐘聲落翠微

吳承恩

七首

承恩字汝忠淮安山陽人長興縣丞有射陽先

生存藁

陳玉叔云汝忠緣情體物其辭微而顯其旨博而深淮自張文潛以後一人而已李本寧云汝忠與徐子與最善

往還倡和今按其集獨不類七子率自矜曠出之以彼其才

僅為縣丞以老一意獨行無所扳援附麗豈不賢於人哉

對月

人言天上月中有姮娥居孤樓誰與共顧兔銀蟾蝓冰

輪不載土桂樹無根株紛紛黃金粟歲歲何由舒一閉

千萬年玉顏近何如相違不咫尺照我闌干隅一杯勸

爾酒為我留須臾

富貴曲效溫飛卿體

燒燭迷妝閣春旗隔步廊兩眉京兆画三日令君香羶

窄芙蓉衩釵危翡翠梁羨他雙海燕先占鬱金堂

楊柳青

村旗誇酒蓮花白津鼓開帆楊柳青壯歲驚心頻客路

故鄉回首幾長亭春深水漲嘉魚味海近風多健鶴翎

誰向高樓橫玉笛落梅愁絕醉中聽

田園即事

大溪小溪雨已過前村後村花欲迷老翁打鼓保社裏
野客策杖官橋西黃鸝紫燕聲上下短柳長桑光陸離
山城春酒綠如染三百青錢誰爲攜

秋夕

竹火煎茶寺菱歌載酒航人間秋夕好第一是錢唐

東未齋陶師

牀頭社甕鷺兒熟江口春船石首來欲就吾師謀一醉
講壇何日杏花開

勾曲

紫雲朵朵象芙蓉直上青天度遠峰知是茅君騎虎過
石壇風亞萬株松

曹大同 二首

大同字子貞南直隸通州人由歲貢生授光祿
寺署丞有玉芝樓集

秋日田居

屏居謝人徒朔風吹寒雨遠樹旣盤紆溼雲亦交互愁
鷗戀故林隱豹諳長霧羃歷川光昏蒼茫野火聚耳目
暫無擾閒情託豪素拙訥罷干時賞心於此遇飛光忽
我道咄咄歲云暮眷言採三秀頽齡儻能駐

遊仙

有道百靈初無名萬物始九氣煉中和三元謝甲子化
昇隨感遷清越徹表裏玄圃御斑麟丹丘乘赤鯉左拍

浮丘肩右躡羨門趾山成數寸塵海無三尺水長嘯宇
宙外超然得不死

張循占 一首

循占字元易蒲州人官光祿署正有嘉樹齋橐

軍城秋夜

寂寞軍城暮浮雲暗斗杓戍樓人未散絕塞馬仍驕夜
雨千門冷秋風萬木凋籌邊王相國金甲未應銷

錢元鼎 一首

元鼎字實夫桐城人鴻臚寺丞

偶出

臥榻淹三伏肩輿出早秋青溪通小市香稻滿平疇有

約過鄰舍忘機對水鷗已成迂嬾性身外更何求

沈堯龍 一首

堯龍字易之湖州人由貢生官鹽運司有列藝

集

丙寅誕日

年來蹤跡逐風塵忽感懸弧笑此身白髮有時還到我
青山何處不容人漢家鹽鐵錙銖重楚國旌旗日夜新
且與蘋洲亭上客一竿春水共垂綸

魏學禮 二首

學禮字季朗長洲人以歲貢選鎮江訓導擢國
子學正陞廣平同知時與劉鳳齊名合刻詩曰

比玉集

李時遠云李朗辭鋒甚銳當勝子威一籌

昭君怨

翠袖辭金殿青苔闕紫宮香寒羅帳曉春盡玉階空
明月琵琶曲驚塵朔漠風一作豔態消衣上悲情落管中君恩原未薄妾夢向來同

贈黎仲子

伊人結客少年場芳艸長亭正夕陽忽見雙魚來萬里
始知尺素下三湘布衣然諾輕朱建冠蓋縱橫憶鄭莊
郢曲自來多白雪遲君早晚賦長揚

孟思一首

思濬縣人通判有龍川集

秋夜期友不至

西風散秋聲搖我庭間樹月寒艸露光山靜星河曙林
鳥相向啼昆蟲紛若語美人期不來幽客徒凝佇

周沛三首

沛字允大紹興山陰人有浮峰集

詩話周氏宗譜不言允大登仕籍而徐文長集有哀周鄭州沛二詩

別顧孝常

馬離鳴故羣人去懷心知憶昔邁君始意氣如連枝如
何倏離別旦夕殊歡悲滔滔斯世士孰與吾心期言念
古之人同心不同時同時復睽隔何用同時為

冬日

明言錄卷四十八
滯靈迫冬日山川掩重岡引領望郊邑遠樹鬱蒼蒼浮
雲馳白晝迅風激衣裳中野少逢人乃見鳴鴈翔我有
一束書因之以遠將其多至萬言其音悲且傷終以重
見辭翩翩各一方攬涕下長坂躊躇不能忘

紅羅女

山東之賊紅羅女用兵迅疾如風雨白蓮授術成妖精
能令照鏡生公卿海內承平日已久乍見干戈皆却走
驅馳費盡中丞心羽書未報收刁斗紅羅女爾非男子
身蛾眉粉黛當青春跨馬彎弓無可樂何用風塵來殺
人山間小民饑餓苦日辦官需夜猛虎貧賤那堪更亂
離慎勿橫行到吾土

張之象 二首

之象字月鹿一字玄超松江華亭人以太學生
入資選授浙江布政司經歷有剪綵翔鴻聽鶯
避暑題橋倚蘭擊轅佩劍林栖隱仙秀林新草

諸集

莫子良云玄超詩爾
雅冲澹興寄寥遠

春日遊燕子磯

古稱秉燭遊行樂恐迨暮策駕尋名山居然得真趣展
宇開霽旭熙陽斂昏霧雲錦被奇峰水鏡含芳樹眷茲
風日佳開觴藉蘭杜頗懷披襟友諸美難具晤流鶯稍
出谷飛花已盈路暢哉人境外屏跡遺世故勿為京洛
士緇塵染衣素

梅花落

玉樹飛花早金閨引恨長雪明難見影風急易聞香舞
處飄羅袖歌邊繞画梁歲華憔悴盡魂夢憶遼陽

楊文卿一首

文卿字子質鹽山人稷山知縣轉南京都察院
經歷有鷗海集

秋日送曾公子實卿之延書扇頭

車馬翩翩送客行離愁遽逐海雲生三杯籬落菊花節
一路蛩螢豆葉聲荒艸濁河連古戍悲笳明月動山城
鯉庭趨後勞相報婚嫁如今累尚平

朱永年一首

永年字仲開儀真人官光山知縣有朱仲子集

李時遠云仲子
詩有曠達之趣

詠懷

南鄰競歌鐘北里吹笙竽我獨甘寂寞守此貧賤廬蓬
戶不掩華簾瓢常晏如負郭住窮巷門無長者輿彈琴
發雅操誦詠詩與書安神在閨房憺泊思玄虛至人求
髣髴榮名非所須

丘雲霄

四首

雲霄字凌漢崇安人嘉靖十七年貢士選南京

國子典簿遷柳城知縣有止止齋集

詩話止山驂鸞作史解組歸田栖息武尼山中閉關講學嘗與其友夜
宿高明樓中夜有怪倚門作人語曰同遊不樂乎何臥之早也止山應

之曰我載晨而遊抱日而歌汝胡不吾和而同其樂何為昏暮而來也
怪應曰不能止山曰吾亦不能怪歎息而去可謂不惑不懼者已松陽
徐夢陽評其詩稱其雅澹勁古景真情得
要之不蹈襲前人異乎七子之派者也

溪月初出水

溪月初出水照我清夜堂沈憂不成寐踟躕步寒光飛
鳥深夜號遶樹林煙蒼有懷空自知默默心摧傷

怨詩

江石如龜甲隱隱浮明沙不障東之水偏驚游子查游
子去鄉國長風吹斷霞斷霞只在天游子去無涯泠泠
秋已老飄蕩未還家

寒露同李洗松宿方塘書舍

露重憐今夕秋深試薄寒溪聲亂籬落月色動柴關菊

密欲藏徑花嬌故傍欄相看疑夢寐秉燭問更闌

江晚

帆勢迎風疾灘聲入暮誼漁燈出疎樹客路問前村野
鶴冲煙迥山花帶雨昏寒江何處宿幽思未堪論

施漸三首

漸字子羽無錫人歲貢生授海鹽縣丞有武陵

集

王元美云施子羽如寒鴉數點流水孤村惜其景物蕭條迫晚
意盡俞汝成云子羽趣味悠深聲調雅雋在韋柳錢郎間
詩話子羽僅初舜咨與華子潛酬和時
號錫山四友三君皆非華敵子羽差優

贈人遊蘭亭赴陳山人約

靄靄深竹林林深阻修澗清川流其間懸崖俯可辨春
蘭日以芳風氣日以變君往對山人如逢昔人面

贈吳還

山人為客吳門久，白髮蒙茸將被首。興到青山不問家，笑來花肆常沽酒。行路蕭然滿篋詩，風流文采雅堪師。自言身是陶弘景，說與世人誰得知。

竹房

寂寂春窗下，惟餘修竹陰。忽聞人共語，送客出深林。

李才一首

才樂安人舜臣子官主簿

雲中寄周總戎

雲中日夕傳烽火，萬里邊風羽檄催。胡馬長驅光祿塞，漢兵不度白登臺。三關鼙鼓秋何急，七郡蒸黎日轉哀。

試問漠南諸將士，只今誰是出群才。

嚴怡三首

怡字士和如臯人以貢為博平訓導有石溪集

擬古

采采南山桐，十年成一琴。製者豈不苦，謂世有賞音。持以奉君子，不與我同心。擬鑄鍾子期，家無雙南金。

石人

高岸勢若崩，上有誰家墓。已無墳上土，尚有墳前樹。樹下多行人，車馬成廣路。此地少豐艸，幸免穴狐兔。石獸半埋沒，碑版知何處。往者盡如此，來者永不悟。石人不解語，空泣艸頭露。

曲塘

土墻茅屋竹籬笆楊柳風高燕子斜可是曲塘人好事
家家屋角有桃花

李奎一首

奎字伯文錢塘人以布政司吏再考錦衣從事

有珠山集

彭子殷云珠山詩一以興象為宗篇多渾融句多藻緻讀之爽氣滿前

詩話伯文周旋沈青崖於獄中者以氣義聞詩特寄興也

採藥

山中宿雨過嶺上明霞赤荷鋤入南畦藥苗始堪摘黃
精種未鋤紫芝已盈尺隔水望茅茨還歸煮白石

明詩綜卷四十八

明詩綜卷四十九

小長蘆 朱彝尊 錄

歙州 汪立名 緝評

萬表 六首

表字民望鄞縣人正德末中武進士累官都督

同知僉書南京中軍都督府晚號鹿園居士有

玩鹿亭橐

顧玄言云鹿園才清思逸稟履高曠詩如空巖曲瀨宛轉寥夔時復滴瀝得幽閒真趣有韋應物深致七言氣

骨稍弱

靜志居詩話鹿園裴帶翩翩志存開濟好從方外遊間與羅達夫唐應德諸公講性天之學倭寇為患守土者力不能支公遂結少林寺僧傳格鬪之法倭猝犯赭山公使釋孤舟統其徒二百人薄倭營縱火前擊敗之俄太倉來乞師公別募月空等十八僧選經師天負為將戰於翁家港諸僧衣錦袈裟持杖口含澱藍遇賊以藍塗面自地躍起若保鬼前搏倭大驚以為神遂大敗倭追及嘉興之白沙灘盡殲焉後遷官

留都道出蘇州卒遇寇楊涇橋孤軍與戰得出身中流失以書報家人曰家世死戰唯吾持文墨論議未嘗身將兵今晚年增一箭瘢可無憾矣蓋萬氏自武略將軍斌戰死阿魯完河子指揮僉事鍾與靖難兵戰死花園孫明威將軍武從征交趾師次檀舍江陷陣死武弟文襲兄爵守桃渚有龍夜戲潮浮水面遙望兩炬光以為賊火引強弩射之應弦落其一炬不知為龍目也龍負痛騰躍文船漂没人稱射龍將軍三世不得裹骨歸葬故鹿園書云然鹿園子達甫仲章鎮國將軍孫邦孚汝永都督僉事皆材兼文武達甫有皆非集邦孚有一枝軒橐題江心寺云清磬龍聽法空階月送潮此仲章警句也

憫黎吟

三首

參政平崖錢公出憫黎諸詠見示惻然傷懷因而有作

地何產柎與速民何畜豕與犢豕犢盈盤吏反嗔柎速窮年采不足刻箭為約安得銷黎人借錢無約刻箭記之歲歲生當剗吾肉負戈因拚一命償嗟嗟黎人誰爾牧

虎兇來猶可奔狼師一來人無存大征縱殺玉石焚昔人鵬勦只一村鵬勦功成賞不厚大征廕子還廕孫殺一不辜尚勿為何况萬骨多冤魂

鑿而飲畊而食撫黎何事來相逼舊設有撫黎老人瘠牛可畊豈

不惜薑水那堪吞滿臆撫黎逼黎人之財則以薑水灌之遙明燈火忽驚疑

一望旌旗我心惻撫黎至黎則明鏗揚旗以往羣黎艸木豈有知貪吏股

削無休息攻掠犯順誰所為撫黎毒黎還毒國

夏日飲許負外山亭即景

一亭梧竹裏迥出市塵間石逕緣蘿入江峰對座間海雲朝屢變山鳥暮雙還別去衡茅下思君嬾閉關

江南曲

客從潮陽來夜泊秦淮口鄉語人不知兒童聞拍手

宮人歎

莫向雲屏羨阿嬌暫將清泪度春宵帶圍自此拚長減
待得君王愛細腰

劉 銳 一首

銳字蓄之海鹽人世襲海寧衛指揮使有春臺

集

錢幼卿云海村抽簪邁軸寓意詩篇與瀛洲諸老和酬卓然自振於倚伍

詩話海村少補諸生屢試不利乃食世祿里居賑飢散藥以厚德聞有僕名木善射一日水鶴集資聖寺鳴吻木射之貫其左翮鶴帶矢盤旋良久竟集中庭如臆訴者海村曰嘻必木也命拔其矢縱之不能飛乃命木飼之旬日創愈向主人鳴舞翺翔而去海鹽人至今能道之

和徐東濱

何處幽樓好城西有茂林山來當戶翠竹長隔墻陰哺

子飛梁燕窺魚下水禽閉門無所事赤日任流金

余承恩 四首

承恩青神人官永寧叅將有鶴池詩集

詩話鶴池為太保肅敏公孫肅敏有社稷功世襲錦衣衛指揮其子忤權倖調外衛故鶴池終身不得侍禁籙詩集八卷銅梁張肖甫序之

感興

白日沉西陸返景流東岑端居屏塵翳欣然理鳴琴大
雅僉不悅馳情在鄭音違俗信靡合安可同荒淫達人
宜止足嘉遯我所諶富貴苟非義一唾麾千金

答草池約汎蓉溪

春來花鳥總關情夜雨愁聽不到明怪殺主人猶病酒
晴江鼓柁放舟行

泛舟

芙蓉溪水三尺強蒼蒼兩岸花艸香若待長江新漲合
撐舟直上小茆堂

望忠州

高江落日片帆秋岸上漁罾次第收無數峰巒雲霧裏
舟師指點認忠州

戚繼光

二首

繼光字元敬登州人世襲衛千戶以參將備倭
浙東大破倭於台州以副總兵鎮福建大破倭
於平海衛閩寇既平以都督同知召理戎政出
為薊鎮總兵進左都督加少保卒謚武毅有止

止堂集

錢受之云少保結髮從戎間關百戰緩靖閩浙功在東南
生平方略欲自見於西北者十未展其三故其詩多感激

悲壯抑塞憤張之詞
君子讀而悲其志焉

詩話少保平倭之功戰勝攻克擬有紀効新書在薊日與總制譚公綸
樽俎折衝擬有練兵實紀論者比之孫吳韓白焉軍中有暇輒與文士
接席賦詩集名止止棠曰愚
愚居曰夢夢是亦好奇矣

盤山絕頂

霜角一聲艸木哀雲頭對起石門開朔風鹵酒不成醉
落葉歸鴉無數來但使雕戈銷殺氣未妨白髮老邊才
勒名峰上吾誰與故李將軍舞劔臺

度梅嶺

溪流百折遶青山短髮秋風夕照間身入玉門猶是夢
復從天未出梅關

俞大猷 一首

大猷字志輔晉江人世為百戶嘉靖中舉武進士累官都督同知佩征蠻將軍印進右都督卒贈左都督謚武襄有正氣堂集

挽薛養呆

伐木風不還今古幾心知我與君結契相期弱冠時平生一然諾盛衰永不移我善君相助我過君相規嗟君忽奄逝一老不憫遺昔為暫離別今作長相思戚戚重戚戚良朋今有誰

張通 一首

通鳳陽人官至都督僉事

遊西林菴

野寺蕭條一徑微山僧相見語禪機雲深石洞玄猿伏煙鎖松林白鶴歸上界疎鐘通碧落邊城鼓角送斜暉浮生自覺渾無定欲解鳴珂問釣磯

周于德 一首

于德號南墩淮安人官至京營都督僉事

平烏刺江

春蒐馬跡遍南荒夷獠新降罷畫疆絕壑危巖通鳥道飛旌曼鼓遶羊腸黔瀘東下歸辰浦箬若西來接夜郎王化遠行銅柱外炎州萬里盡梯航

張元凱 十一首

元凱字左虞吳縣人蘇州衛指揮有伐檀集

元王

美云將軍詩格務躋武德貞觀其語寧有瑕璧而無完珉汰陳而使
之新非有沉深劇刻之思未易致也 錢受之云左虞以督漕達燕薊
覽觀宮闕苑囿親見齋宮醮壇之盛作西苑詩竊比諷諫之義王長公
序其詩以沈始興曹竟陵為比左虞夷然不屑也左虞沒長公伏日曝
書得其行卷歎其知之未盡為詩
一章屬其子孟孺酌而焚之殯宮

詩話左虞西苑宮詞高出元美之上元美比於
沈慶之曹景宗仍以武夫遇之未為知己也

春日游西苑

宣室臨西苑靈臺對籍田宮鶯迷綠雨廐馬飲清川柳
引金堤直松含玉殿圓先皇受釐處寂寞鎖春煙

西苑宮詞

十首

肅將上帝祀明堂寶鼎昭回日月光九獻不須歌舊曲
詞臣昨已撰芝房

秋殿清齋正受釐迎和門外立諸姬大官不進麒麟脯
御撰惟供五色芝

陳詞瘞玉奏鈞天西苑宮牆近籍田水旱恐煩祠后土
未央深處好祈年

夕烽千里照甘泉一紙降魔勅已傳急遣六丁乘羽駕
火輪金甲淨幽燕

靈藥金壺百和珍仙家玉液字長春朱衣擎出高元殿
先賜分宜白髮臣

通天臺上接三台景命重臨清醮開拜舞不同郊社禮
科儀一一聖人裁

香通紫氣靄晴空靈貺神休集聖躬垂拱萬年如一日

禮臣何必議青宮

金符寶笈護雲英鸞鶴銜將入上清拜受玉霄龍鳳簡
元陽象一字分明

蓬萊方丈可梯航勾漏丹砂近寄將昨貯銀山高幾許
試將玉尺殿中量

瑞氣祥雲薄海濱遼藩齊獻百千春進來白鹿高於馬
馴擾金塔不畏人

李元昭 一首

元昭字用晦杭州人世襲千戶有岫嶠山房集

送周虛巖歸吳

返棹歲將晏離亭酒共酌 一作亦深 島雲寒沒影江日凍生陰

莫惜飄蓬跡應傷折柳心丘中別同調聊復理鳴琴

黃喬棟 一首

喬棟字以藩晉江人官叅將

半峰菴聽秀上人彈琴

高僧理鳴琴古調盈人耳濤生松下風龍起鉢中水聽
罷猶泠然月出疎篁裏

張如蘭 一首

如蘭字德馨南京羽林衛世襲指揮官至淮徐
漕運叅將以子可大貴贈特進榮祿大夫右都

督有功狗集

吳門夜泊

帆影初抽落日斜江橋風湧太湖沙行人莫上蘇臺望
無復吳王苑裏花

秋從夏一首

從夏字以忠臨清衛人官叅將

月夜同劉天山作

孤館寒燈夜相看聽晚笳清宵醒客夢明月落梅花碧
海潮聲急清霜雁影斜不堪憐歲暮况復是天涯

袁應鞞一首

應鞞字仲子揚州興化人守備

鄭司馬入塞歌

十載籌邊鬢欲秋玉門生入未封侯君王豈惜師中命

尚有山陰十六州

奚汝嘉一首

汝嘉字子美江都人揚州衛百戶

旅懷

十日雨初霽一年春已殘苔痕蝕徑滑艸色釀陰寒昔
悔從軍易今悲作客難殊方有桃李能得幾回看

陳鶴一首

鶴字鳴野紹興山陰人世襲百戶有海樵集王敬

美云鳴野詩飄宕悽惋 顧玄言云鳴野詩初擬貞觀以還晚得大
曆中格 錢去病云海樵七古流麗似李頎七絕爽朗似王昌齡
詩話海樵家居怪山之麓金庭閣老其女夫也山上有息柯亭傳是閣
老所建而海樵集中酬周山陰張會稽攜酒見訪之作中云相攜直上
息柯亭恐是海樵故宅中物矣五言如近海潮通郡連山瘴入樓山川
留別夜風雪望鄉人孤月長隨棹寒潮自到門繞廬松葉暗穿竹水聲

明詩總卷四十九
齊明月幾家好故人今夜俱七言如床下鳴蛩偏入夜風前白苧不宜
秋風塵會面猶難卜世事傷心只自知細雨殘燈歧路酒清江紅葉寺
門舟薄游兩見雁歸寒多病却憎花滿樓高士遠栖滄海曲好山多近
永嘉場山深倦鵲猶依樹風定飛螢忽上樓比於田水月雖才鋒不及
而鑄詞
差醉

夜坐見白髮寄別朱仲開張甌江

坐久北風起江聲帶遠沙客愁初到鬢鄉夢不離家林
靜無殘葉燈寒有落花懷君夜難寐別緒轉如麻

高郵贈龔山人

近苦江東水轉憐淮北大入秋嘗白稻留客鱸青魚樹
柵春收犢穿潮夜灌渠期君結鄉社同著養生書

泊京口望金山寺

南徐一片石千古柱中流繞樹開僧舍綠空結梵樓疎

燈明水底落月挂潮頭向晚禪鐘起風吹到客舟

題楊法部容閒閣

閣傍江城外窗開雲水間祇因塵境遠自覺主人閒日
落見歸鳥月明看遠山移船候潮至相送野僧還

寫山水

夜來風雨惡落葉打柴關曉起敞溪閣亂雲猶在山

題畫贈姜明府

暮雲春樹路千重雪後看山到處同夜永燈寒無過客
月明江色滿樓中

送張伯淳還關中

憐君獨棹渡黃河西北山川入雍多料得到家春未至

馬蹄半在雪中過

送王諫北上

東去春潮到驛門
半江風雨近黃昏
由來知己難為別
不是殷勤戀酒尊

吹笛懷友

玉笛橫吹入夜分
中天華月度流雲
苕川兩岸春風起
飛盡梅花不見君

池上聽陳老琵琶

夜深池上弄琵琶
萬里銀河月在沙
莫向尊前彈出塞
只將邊將未還家

陳第 十二首

第字季立號一齋連江人初為學官弟子俞都督大猷召致幕下教以兵法起家京營出守古

北歷遊擊將軍有寄心集五岳兩粵游草

錢受之云季立

不得志繼俞戚之後登壇為名將拂袖歸里尋開焦狀元弱侯老而好學累擢白門離經析疑扣擊累年卒為名儒論兵論文皆鑿鑿有根據詩話一齋投筆從軍受知於譚襄毅俞武襄戚武毅三公江陵既沒論者謂武毅不宜於北徒之嶺南一齋作塞外燒荒行有云年年至後罷防賊出塞燒荒灤水北枯根朽草縱火焚來春突騎飢無食又云隆慶二載譚戚來文武調和費心力從前獎政頓掃除臺城兵器重修飭迄今一十五年間閭閻雞犬獲寧息譚今已死戚復南邊境危疑慮巨測患難易共安樂難念之壯士摧顏色論者不引今昔觀紛紛搜捕臣滋惑又送戚都護絕句云轅門遺愛滿幽燕不見烽煙十六年誰把旌麾移嶺表黃童白叟哭天邊誦其詩扼腕於封疆之事深矣一齋儲書最富余嘗游閩臨發林秀才侗持其後人所輯世善堂書目求售燈下閱之見唐五代遺書琳琅滿目如披靈威唐述之藏多平生所未見不覺狂喜秀才許至連江代購踰年得報書則已散佚徒有惋惜而已

歲暮客居呈弱侯

明言錄卷四十九
十
仲尼本周流忽發歸與歎意在就六經匪爲思鄉串嗟
我老無聞託興游汗漫邈想古通人反側常宵半秣陵
一君子少小登道岸嗜學自性成義易旦夕翫近得從
之談恍上中天觀詩書數千載立語窮真贗欣然遂忘
家何知有歲晏

邵武舟次

樵川泛輕舟青山起當面薄霧頻往還奇峰互隱見灘
灘若峻坂下下如飛箭秋容西楚同人語南方變茂樹
雜村煙澄溪勝江練始知溯洄艱轉喜隨流便對景持
一杯幔亭未足羨

禹碑行

岳麓神禹碑何年鐫刻之真蹟雖莫窺字體殊瑋奇儼
如冠冕之獨立矯若鳳鳥之來儀或盼而連目或聳而
並肩或展而雙足或握而兩拳神藏蘊蓄意騁踳躑旣
非鳥跡之蹠蹠亦非垂露之涓涓篆隸八分抑又邈焉
計歷年之旣久何點畫之新妍豈鬼神之默護故歲久
而彌鮮據譯讀之恍惚未必當日之真傳余過長沙弗
覺偶至湘潭返船直肩輿而迅步遂冒雨而陟巔喜胸
襟之豁滌獨坐翫而弗旋昔韓退之嘗千搜而萬索至
咨嗟而涕漣余實迷途之未遠無亦此生之宿緣

山中早秋

春夏詎能幾淒淒白露還秋容先到草客意未離山石

鼠窺禾去清蟬抱樹間人生衣食外焉用苦閻關

江心寺除夜

偶過江心寺何期又歲除百年俱逆旅信宿即吾廬岸
隔遙沽酒厨寒剝煮魚客游隨處好鬢髮任蕭疎

客中立秋

蒸濕前朝雨淒涼今夜風秋聲先蟋蟀露氣到梧桐頓
覺絺衣薄尤憐旅橐空潞河問舟楫明月向吳中

閩關旅夜

已是吾鄉土離家尚十程疎窗通野色孤枕傍松聲搖
落秋難賦悲歌夜不平僕夫催曉發燒燭待雞鳴

南岳舟中

吳門一水接楚塞衆山連書史同昏旦江湖且歲年洲
迴蘆莽莽檣動燕翩翩何處爲南嶽雲開望杳然

維揚謁文信公祠

萬死艱難地千秋伏臘新山河終破國天地已成仁江
橘南中像巖松雪後春徘徊歌正氣不覺淚沾巾

過薊州

燕京八千里復作薊門行剩有溪山興能忘沙塞情朔
風摧短艸寒月近長城流涕二三策何人似賈生

追懷宜黃大司馬譚公

昔年飄泊入燕京制府憐才意不輕獻策獨過司馬署
分符旋赴薊州營祇誇相國知韓信無復功臣妬賈生

秋草春風今日淚不堪回首楚江城

元夕宿泉州洛陽橋

春風又渡洛陽橋柳色青青伴寂寥回首故園今夜月
滿江燈火上寒潮

李言恭 六首

言恭字惟寅岐陽武靖王裔孫襲封臨淮侯環

衛侍直留守陪京加大保有青蓮閣貝葉齋游

燕諸集

穆敬甫云臨淮詩清遠有調庶幾大曆中語 胡元瑞云
敬美序臨淮詩郭定襄後一人咸謂寔錄予以惟寅文雅

尚當過之

錢受之云惟寅詩風氣婉弱時有韻

致如夢回芳艸遠人去落花多藝苑至今傳之

詩話李惟寅詩如四姓小侯橋門列

席雍容章帶哢咤彭蠡之氣都盡

花朝

二月寒猶峭燕山雪未消春來無艸色病裏又花朝鴻
鴈鄉書斷關河旅夢遙武陵溪上約今已負漁樵

賦得匡廬山

匡廬凌碧落青磴與塵分湖海遠還見雷霆低不聞石
門鳴宿雨瀑布濕流雲獨有山人屐常隨飛鳥羣

送陳玉叔郡守淮陰

別思深難遣離魂暗欲銷人隨流水去心共暮雲遙野
市懸高岸江城響夜潮所嗟相憶處風雨正蕭蕭

送仲弟南還兼懷老親

無限離愁匹馬前况多風雨斷鴻邊板輿未得歸潘岳
春艸何堪送惠連伏枕夢回滄海月登臨望極白雲天

飄零若見高堂問雙鬚休言異昔年

李僉憲招飲黃鶴樓

勝地慚非作賦才清尊今向大江開當年黃鶴雲中去
何處梅花笛裏催一作來風起一作卷潮聲喧島嶼日斜帆影上
樓臺相逢俱是他鄉客衰艸涔陽漫復哀

顯靈宮

先帝祈靈太乙祠重來空憶翠華旗殿中香火儀猶具
海上仙人事轉疑客與方書閒指畫老來詩律舊心思
調高身健慚時輩高閣憑闌眼故遲

詩話京師顯靈宮在宮城之西長陵建以祀王靈官者也靈官藤像長陵每載之軍中有禱輒驗及金河川昇不可動宣德初拓其祠額曰大德顯靈宮復建東西二閣嘉靖三年營龍虎殿以奉元武焉閣中留題者衆以惟寅為擅場其云海上海上仙人者杜傳藤像獲之東海中

呂詩臣

十首

時臣字中甫鄞縣人有甬東山人集

陳臥子云中甫詩頗有高岑遺

調

詩話中甫以避仇客歷下與李中麓楊夢山切劇酬和既轉客青州衡莊王邸起高樓東向眺遠樓成王於望後四日置酒召客時日景既盡疎星尚微王未肅客坐憑闌語笑已而月上王歡甚因命曰待月樓請客賦詩中甫詩云川原夕氣交暝色自相向月猶藏海底人已坐樓上王賞擊謂待字義手觴奉之俾居客右晚客潘宣王所客死河南中甫年六十治生壙於句章之夕陽里自撰墓銘後十年乃卒歸櫬葬焉詩品在中麓夢山之間同時曳裾王門者多遜之

襄陽蹋銅蹄

青蒲沒漢水白馬度襄陽男兒但得意何處非故鄉

山中吟

桃源渺何許武陵萬仞山緬想秦時人生死桃花間瀾

明詩總卷四十九
來逾千載曾無幾人間桃樹摧為薪桃源平作田雞犬
入租稅焉可住神仙

交州古劍歌

古交州天陰日落鬼啾啾終宵白氣衝牛斗過客往往
驚回頭主人知此有靈物呼兒掘得雙吳鉤螭蟬半蝕
銅花綠淒淒霜鏗寒光流古來異物不易取令人得之
反生憂放之唯恐蛟龍怒卷之猶畏神鬼愁亟命冶人
復解鑄神器恐遭真宰怒不然仍貯空匣中恣爾含光
在泥土

秋田為李生得衣字

明農兼課子田舍有書幃穰稷霜初下雞豚秋正肥西
風菰米飯落日豆花扉已得遺安計無嫌老布衣

夜懷

起來喧不減策策動涼風月暗蟲聲裏人孤樹影中南
埏寒尚早北地候難同想到鄞江上秋花滿舊叢

留別少府子魯

木落見中州遙連白帝愁黃河臨斷岸明月上孤舟作
客已多歲還家又暮秋思君西下日寒葉滿江流

次李大參韻留別

河北中秋盡江南九月歸艸深藏虎穴潮滿上漁磯田
舍春新稻山妻補舊衣到家貧自得莫怪與君違

金山寺

萬古一卷石東南何壯哉半江截吳楚兩岸瞰樓臺僧
飯蕪城乞人煙鐵甕來春深龍聽法風雨帶潮回

諸公邀登甘露寺留別

天風飄忽芾袍輕兩度登臨慰客情疎磬雨催山寺曉
亂帆春放海門晴江迴鐵甕三吳盡潮過金陵七澤平
明日別離何處問斷腸煙樹漫蕪城

再經鍾吾懷許兵馬

去日黃河邊水深不可渡故人久不回今作行人路

鄭若庸

五首

若庸字中伯崑山人有蝓蜨集

李時遠云山人與茂秦齊名其詩氣格稍弱

詩話中伯曳裾王門妙擅樂府嘗填玉珎詞以訕院妓一時白門楊柳少年無繫馬者羣仗惠之乃釀金數百竹薛生近究作繡襦記以雪之

秦淮花月頓復舊觀承平勝事雖小堪傳今之秋兔寒鷄想像昔年之酒旗歌扇良足豔也

秋涉

蒼山崔巍照秋渚紅樹離離夕陽渡行人涉水更看山
馬足凌兢來復去雲際人家望欲迷松關蘿徑隔煙扉
山僧臥穩西巖寺時有鍾聲落翠微

王內輔三泉將命太嶽

神嶽蟠中極凌虛勢自孤星辰低絳闕雷雨護清都山
色遙連蜀江流直入吳金箱有靈秘到日佩真圖

衛水離歌

天涯何處客愁新濁酒初酣欲問津莫道三秋歸計晚
尊前猶有未歸人

送張甘蘖刺史

衛水樓船曉向東，青山南望一重重。
因君此別增鄉思，目送春帆細雨中。

丁小山赴浙東藩幕值余清泉賦別

清秋衛水汎樓船，京國逢君已十年。
漫對綠尊悲白髮，天涯去住一凄然。

顧聖少

二首
聖少一作字季狂吳江人

留別謝茂秦

相對忽不樂，愴然傷我心。他鄉有同懷，胡為遽分襟。
憶昔醉燕市，擊筑誰知音。意氣獨吾子，排難輕千金。
重以易水歌，兼之吳會吟。論交豈不遠，投分遂至今。
我亦慕三閭，南去湘之陰。楚山一何長，楚水一何深。
他日遙相思，鹿門還可尋。

送李汝學還上黨

傾蓋同為客，攜尊復送君。悲涼誰作賦，南北此離羣。
坂沒羊腸雪，山橫熊耳雲。相思豈無鴈，可待九秋聞。

尤嘉

一首
嘉字子嘉嘉興人有西陵集

詩話子嘉亦趙康王客穆敬甫錄其詩以比謝四溟句如偶因看竹來僧院不為求魚坐釣磯頗有自適之趣康王賓客無多而吾里有二其人春龍也

送劉山人往太原謁梁李二使君

平原日落雁聲寒送子西游歲欲殘共惜異鄉裁別賦
更於何處解征鞍山橫熊耳尖如削路遠羊腸曲似盤
自是陳蕃能下榻匣中長劍不須彈

徐渭 十三首

渭字文清更字文長山陰人有櫻桃館集

陶周望云文長

詩雜出於中晚宋元往往深於法而略於貌袁中郎云文長詩有一段不可磨滅之氣如嗔如笑如寡婦之夜哭窮人之寒起當其放意平時千里駕爾幽峭便是鬼語荒墳陳臥子云文長亦有正音李舒章云文長詩材粗點雅人所少然其一往有雋處如部曲少將新跨紫騮

詩話文長詩原本長古間雜宋元流派所謂斐然成章不知所以裁之者其自評云吾書第一詩二文二画四然詩之木免繁蕪不若画品小

塗大抹俱高古也

入燕

董生抱利器鬱鬱走燕趙賤子亦何能飄然來遠道行
止本無常譬彼雲中鳥朝飲西園池暮宿北林杪感事
復懷人生年苦不早欲弔望諸君跡陳知者少垂首默
無言春風秀芳艸

柳元穀以所得晉太康間冢中杯及瓦券來易余

手繪

遙思冢中人有杯不能飲孤此黃兔窰伴千三百稔券
鏹四百萬買地作衾枕想當不死時用物必弘甚尊壘
羅寶玉裹祿賤繡錦豈有纖纖指捧此鍛泥葦存亡隔
一丘華寂迥千仞活鼠勝死王斯言豈不審

送蘭公子

阿翁學師也揚州人

耶溪芹藻色相伴秋荷老公子竭重來傷心那可道會
日苦無多相別一何早八月廣陵濤一葉渡殘照

俠客

結客少年場意氣何揚揚燕尾茨菰箭柳葉梨花槍為
弔侯生墓騎驢入大梁

陰風吹火篇呈錢工部

陰風吹火火欲然老臬夜嘯白晝眠山頭月出狐狸去
竹徑歸來天未曙黑松密處秋螢雨煙裏聞聲辨鄉語
有身無首知是誰寒風莫射刀傷處高旛影臥西陵渡
幡底颯然人髮豎髑髏避月攫殘黍中流燈火青熒熒
饑魂未食陰風鳴莫言墮地永為厲宰官功德不可議

詩話此美錢工部能憫國殤召僧施食而作陰風吹火八句句句警策
具體長吉而得其骨髓者也以下潭緩拖沓去嘔心人遠矣稍為變易
存之結語尤
索然無味

春日過宋諸陵

葉葬未須憐生時已播遷威儀非舊典世代是何年過
客悲山鳥王孫種墓田回看隴頭樹似接汴京煙

嚴先生祠

碧水映何深高蹤那可尋不知天子貴自是故人心山
靄消春雪江風灑暮林如聞流水引誰識伯牙琴

懷陳將軍同甫

飛將遠從戎翩翩氣自雄椎牛千嶂外騎象百蠻中銅
柱華封盡昆池漢鑿空雁飛真不到何處寄秋風

與客登招寶山觀海遂有擊楫岑港一窺賊壘之
興謹和開府胡公之韻奉呈

滄海遙連雉堞明登臨喜共幕賓清千山見日天猶夜
萬國浮空水自平不分番夷營別島願圖方略至金城
歸來正值傳飛捷露布催書倚馬纓

岳公祠

墓門朱戟碧湖中湖上桃花相映紅四海龍蛇寒食後
六陵風雨大江東英雄幾夜乾坤博忠孝傳家俎豆同
腸斷兩宮終朔雪年年麥飯隔春風

宴遊爛柯山

二首

偏裨結束佩刀弓道上逢迎抹首紅夜雪不勞元帥入

先擒賊將出洞中

羣兇萬隊一時平滄海無波瘴嶺清帳下共推擒虎將
江南只數義烏兵

夏相國白鷗園

白鷗池水拍天平相對瓊樓入太清試問歌臺生艸處
當時可許外人行

沈明臣

九首

明臣字嘉則鄞縣人有豐對樓集

莫廷韓云嘉則詩
豪俊清婉情至之

語足無
古人

詩話嘉則文長同在胡少保宗憲幕府並受少保知遇督府周防嚴密
文長恒戴敝烏巾衣白布澣衣非時闖入或出昵飲夜深猶開戟戶以
待嘉則嶽嶽不阿少保遙望見必起立嘗譙將士於爛柯山酒酣樂作
嘉則於席上賦凱歌十章吟至狹巷短兵相接處殺人如艸不聞聲少

保起捋其鬚曰何物沈郎雄快乃爾命刻石置山上及少保死請室中
嘉則走哭墓下持所為誄遍為訟寃比於文長懼禍發狂者相越矣嘉
隆間士大夫以篇什相高最繁富者莫若弇州於時吳明卿之甌甌洞
汪伯玉之太函李本寧之大泌山房諸集以及劉子威馮元成余仲房
屠緯真之徒糟丘肉林愈多愈穢下及布衣如王承父王百穀輩咸以
多相尚嘉則先後積詩七千餘夫安得精然絜之承父則雖饒腐菌間
有神芝即屬芴芻不無嘉惠非若
諸君之叢筍荒茅紛然彌望也

大樹村劉氏少婦打虎行

潤州城南山簇簇四月麥黃桑柘綠大樹村頭劉氏居
短墻幽院參差屋曉炊未罷日始高率地猛虎來咆哮
老小出門盡驚走犬亦吠虎聲嗥嗥虎聞犬聲急轉步
一口斃之如搏兔欲從虎口奪狗還老嫗抱孫逢虎怒
劉家少婦奪老姑氣猛視虎如匹雛手持鋼叉刺虎目
虎血濺面紅糝糊昨從大樹村前走少婦滌場猶髻首
弱體孱然花不如徐家女子劉松婦

抗首

抗首望西秦朝廷急用人玉關疎控扼紫塞滿荆榛痛
昔籌邊賦錦衣衛經歷沈鍊所上有賦憐君侍從臣誰為謝安石談笑淨

風塵

送箕仲之衢州

古路三衢外青山太末餘樵迷仙子質廟過偃王徐楚
橘秋全熟吳楓江漸疎舊游題石處好為一躊躇

顧晉卿席上聞其弟益卿憲副南越之捷喜而賦
之

廿年豺虎劇縱橫百粵遙傳一日平再睹樓船橫海出

更標銅柱伏波名天青馬嶂春銷甲雨過龍川夜洗兵
誰道虎頭非將種請纓原只是書生

浣紗石

不見浣紗人空留浣紗石石邊春艸痕想見羅裙色

凱歌

銜枚夜度五千兵密領軍符號令明狹巷短兵相接處
殺人如艸不聞聲

蘭皋竹枝

東村西村姑惡啼家家麥熟黃雲齊春蠶作繭桑園綠
睡起日斜聞竹雞

過崑山

桃花楊柳共西灣曾唱菱歌帶月還春色茫茫今莫問
滿城煙雨過崑山

無題

夢裏相逢恐未真世間何物不傷春馬蹄明日天涯路
誰是燈前昨夜人

王寅

寅字仲房一字亮卿歙縣人有十岳山人集

汪禹又云

亮卿詞意超逸

詩話仲房少走大梁問詩於獻吉不遇遂從少林僧習兵杖海上用兵
依胡尚書督府尚書不能用竟以敗晚緝鄉人之詩曰新都秀運集其
持論頗偏與岳東伯今兩瑤華相類

吳山秋晚

有客閒居無奈閒為看秋色一躋攀百盤細艸斜陽路
二曲澄江隔岸山野寺最宜紅葉後孤鐘偏在白雲間
賞心又得逢僧話此後幽期數往還

答金在衡訊歸

秣陵宮樹葉初飛客路何人為授衣我亦驚秋同海燕
故鄉端在社前歸

康從理 四首

從理字裕卿永嘉人有二雁山人集

胡元瑞云裕卿近體闕麗翩翩

布衣之雄

詩話裕卿任俠談兵間闢戎幕劉將軍子高建勳毘陵病革裕卿馳赴與訣經紀其喪扶其柩至武林遠近皆義之居燕借黎惟敬輩游西山其倡和詩僅存餘多散佚太倉曹子念收而刻之

再至京口有懷金焦舊游

層城舒遠目迢遞送歸鴻歲月更新曆江山憶舊蹤鐘
聲春浪靜燈影暮流空媿有東林約無因問遠公

同王必漸言懷

江頭木落鴈初飛客子傷心賦授衣鄉夢不緣千里隔
浪遊空說半生非雲山是處堪招隱塵海何年可息機
漫向天涯愁極目幽懷已負北山薇

懷顧太學

登樓風雨暮蕭蕭久客離魂黯欲消楚樹吳雲春寂寞
塞鴻江燕歲迢迢新愁芳艸天涯路舊事梅花月下簫
今日分飛悲萬里憑闌搔首思無聊

送陳京兆致政還白下

挂冠東去共稱賢
天外浮雲意渺然
不是逢萌因世難
祇緣弘景嗜神仙
琴中白雪驚人調
江上青山負郭田
無限長干花柳色
春風不乏杖頭錢

郭造卿一首

造卿字建初福清人諸生為少保戚繼光幕客

有海嶽山房存藁葉進卿云建初詩諸體無不工

寇退鄉人回口占代書

城南烽火近何如
留滯無從訊起居
百里便同千里隔
家書翻比捷書疎
清秋涕淚唯懷土
白髮庭闈正倚閭
欲寫愁心愁不盡
憑君傳語到吾廬

王翹三首

翹字叔楚蘇州嘉定人嘉靖中倭亂嘗居幕府

贊軍事有小竹集

詩話叔楚工画竹子嘗觀其真蹟為賦長歌不知其幕府才雄也邑人侯大年述其繪艸蟲更精惜未得見小竹集一冊中間贈酬諸將之作多居

賞火謠并序

吳城六門莫盛於西閫
六月初賊舉火焚楓橋
達晝夜時宰坐睥睨間
飲酒顧望無異平日時
烈風大作煙焰蔽天不辨咫尺
哭聲遍城內外
或指城上云勿啼哭看城上賞火吁有是哉
賞火謠

金閨門外賊火赤萬室齊燒纔頃刻城頭坐擁肉食人
對火銜杯如賞春城中哭聲接城外宰獨何心翻痛快
憤兵獨有任公子夜半巡城淚不止縋城躍馬出沙河
義師都向湖心死

客夜

山月漸高低燭光有客逗遛衣滿霜淒淒獨夜還自語
茫茫一水遙相望黃花勸酒酒不醉白石放歌歌轉長
孤矢天涯男子事錯將岐路卜行藏

秋懷

碧天大火未全收一雨空庭帶葉流不為無家悲落莫
他鄉燕子早知秋

明詩綜卷四十九

明詩綜卷五十

小長蘆 朱彝尊 錄

率水 程道原 緝評

陳淳 二首

淳字道復後以字行別字復甫長洲人國子監

生有白陽集 張石川云白陽從游衡山稱入室弟子有雲林之

性風疎逸情雲上者邪 錢功甫云先生詩瀟散閒雅恬澹自然如梧

桐半階月楊柳一簾風流水去無住停雲意自閑晚涼生竹塢新水溢

花渠成臻妙境 錢受之云道復少師徵仲天才秀發画工

寫生一花半葉淡墨欹斜非画工可及也詩取適意不求工

靜志居詩話白陽寫生全學 石田詩亦倣之特少神解耳

画梅

風引上春香雪弄南枝色為有惜花心樓中莫吹笛

聞鳥

重重煙樹鎖招提野客來尋路不迷纔過板橋塵土隔
落花無數鳥爭啼

彭年一首

年字孔嘉長洲人有隆池山樵集

徐伯臣云孔嘉詩中含沉鬱之思外

被組纘之華聲調和平詞致暢越可謂風流自命者也

王元美云彭孔嘉如光祿宴使臣節句詳整而中多宿物

詩話孔嘉人品足亞徵仲何稱孝長歌云隆

池處士彭孔嘉徵仲並軼吳人誇特詩不及

庚申秋書事

內廐傳焚廿四坊錦雲花隊一朝亡渥注未見來天馬
槃木無聞貢白狼此日朝廷思李牧他時文簿抑陳湯
運籌急為據長策薄伐宜城古朔方

陸

治二首

治字叔平吳縣人歲貢生有包山遺詩

詩話叔平遊道復之門當時鄉曲之論謂詩得其興

画得其趣然叔平画以工緻勝詩則與道復同流

治平寺納涼

竹根雨過石苔斑鐘梵蕭然晝掩關坐愛微涼生碧殿
忽看飛雨失青山雲分暝色來天外風卷潮聲落樹間
最是晚晴宜眺聽夕陽橫抹蓼花灣

桃花楊柳舞鴨圖

二月吳淞水上灘柳絲風急絮漫漫詩翁賦罷閑凭處
花滿春池鬪鴨欄

錢穀一首

穀字叔寶長洲人有懸磬室詩

詩話叔寶負無典籍遊文徵仲之門日取插架書讀之以其餘力點染水墨超入逸品晚葺傲廬題曰懸磬室王元美為賦詩所云空梁頗受落月色北窗靜候涼風眠者是也手抄異書最多至老不倦傲鄭虎臣吳郡文粹緝成續編聞有三百卷其子功父繼之吳中文獻藉以不墜與公瑕伯穀奔走相門者遠矣

夜登虎丘次韻

遙憶梅花閣還思修竹林煙迷山徑窅雲鎖石苔深香
界期重宿筠亭擬更臨悠然停采艦燈火晚陰陰

居節四首

節字士貞吳縣人有牧豕集

錢受之云士貞画法簡遠有宋人之風画家多稱之

而鮮有知其能詩者詩話商谷繩削斤斤不失晚唐家數

晚坐

鴉背夕陽盡柴門暮色初山寒漸風露人語半樵漁落
葉聞碓急蘆花映日疎年年楚江上不見雁將書

雨後

綠嶼青林白練溪艸深市井路全迷雲將片雨歸何急
麥釀輕寒秀欲齊一水遙連蕭寺外千山不斷石橋西
欲營三徑添松菊立盡殘陽見鳥栖

重題自画小景贈戴子文去画時四十年矣

點染青山四十年寸縑不改舊風煙散人漫竊江湖號
未買松江一釣船

村居圖

茅簷日暖燕交飛雲過墻陰濕翠微中酒經旬掩關臥
蒼苔渾欲上人衣

周天球 一首

天球字公瑕長洲人諸生

中秋長干曲

玉笙低引紫簫長不許商音斷客腸聽到月斜纔入破
飛來七十二鴛鴦

王懋明 一首

懋明字僅初長洲人僑居錫山

毛氏樓居即事

為樓山郭外登眺起幽思片雨沉江暗孤煙上嶺遲鴈

還逢寄字花發滯歸期遠念吳山勝春遊恐後時

姚咨 二首

咨字舜咨無錫人有潛坤集

桂亭為豫章萬隱君賦

南山鬱秋霽重巒桂花白高人愛巖棲躋攀理輕策覽
彼雲木秀悠然縱所適結亭青林端幽賞非矯迹冷風
吹霞裾涼月挂石壁襲芳和天倪餽實駐顏色淮南詎
可招此意良自得願貽瑤華音一慰山中客

西樓席上聽梨園琵琶戲贈

少年文采復風流適意湖山竟日留老去不忘歌舞興
琵琶猶載木蘭舟

周詩一首

詩字以言崑山人有虛巖集

皇甫子循云山人詩婉麗以會景俊逸以宣情春容

以達氣真得古人之髓 王元美云周以言如中智莊芻鉅之根具不至出小乘語 詩話虛巖頗與皇甫昆弟酬和故派亦近之其言云詩之淵妙近體難工而鮮叛逆體易似而實離情衣毛媿借飾西子始勞騁隸終露本來作者既非匠心覽者又皆庸目乃曰甲幾魏晉乙庶齊梁是何古人之多也斯言可鍼危言詩藪之膏肓

靈隱寺

靈隱何年寺青山 向北開澗流元不斷 峰石自飛來竹覆空王苑 花藏大士臺 冥探有玄度 莫遣夕陽催

唐詩二首

詩字子言無錫人有石東山房橐

九日登牛首山

牛首登高處黃花細雨前 山深寒似臘江遠澹於煙 寶刹珠光淨金陵王氣連 六龍曾駐輦聽話武皇年

采蓮曲

風微波不起日暮未迴船 貪看鴛鴦鳥時時誤采蓮

沈仕一首

仕字子登杭州人刑部侍郎銳子自號青門山人

王道思云青門樂府古詞雜味遊適之作麗而有則風致藹然邊關諸詩意氣激發於聲律之外殆雄心俠氣有不能自釋者邪 岳東伯云青門身本貴介志則清真野服山中江遊海覽新篇雅調遠邇齊稱翰墨丹青兼能游藝信乎野鶴之在雞羣祥麟之遊郊外

村居春日

柳堰迷丹日蓬扉啓綠煙 人間啼鳥外興劇落花前 野色連三徑山光滿四筵 鸛鶴如可解堪作酒家錢

陸楫 一首

楫字思豫上海人承父深蔭入國子監讀書有
蒹葭堂橐

次韻送顧龍山南歸

官河春水送行舟君去匆匆不可留須信故園春正好
莫因風雨駐揚州

牟嘉敘 八首

嘉敘字寅定黃巖人有霞溪漫橐

趙方崖云先生以
布衣處窮谷游情

景物能自得師於語言之外
而不越乎尺度矩矱之中

擬古 二首

驅車出門闌車行復遲遲百艸委霜露涼風正淒其天

寒道路艱問君將何之駕言往宛洛相從遊俠兒遊子
去萬里旋歸竟何時安得附飄風致此殷勤辭

灌木產崇崗鬱鬱蔽層丘芳艸依澗側託蔓相綢繆美
人隔遐方宜為君子仇未及登君堂歲月倏已道慨彼
芙蓉花燉爛當清秋采采欲為贈道路阻且修願君保
明哲妾心亦何尤

遊江心寺登康樂亭子

輕舸截奔浪水國散微陰
泂眺孤嶼寶塔凌雙岑
茲遊夙有期始得遂幽尋
淵室接梵語花臺遶龍吟
滉漾元氣中日華映珠林
謝公有遺蹟孤亭俯江潯
曠懷寄玄賞海嶠振徽音
清芬詎可挹高情傾古今
西堂夢不

返池艸春自深

同方用晦遊西谷

褰裳涉西沚披莽散輕屩稍觀山川異煙火隔墟落沿
洄傍溪曲窈窕入穹壑幽尋葛可捫曖曖路疑錯巖雲
冒巾幘霏翠灑林薄汲深俯重淵采秀步崇嶸坐聆伐
木音益感良遇樂返策復流憩逍遙展歡謔眷茲丘園
賞胡爲就羈縛

漁家用從姪存勇韻

茅茨傍江口斷岸依漁梁榜舟蘆花渚間歌和滄浪日
出水禽散風至蒲帆張青簑濕不解臥看南山蒼

送馬斗南歸揚州

去年九月黃花秋邂逅與子城南遊高才磊落不易得
竟日尊酒情淹留三年爲客風塵裏末路相逢即知己
禹穴探幽興未窮梁園作賦詞堪擬一別嗟余還故丘
聞君亦欲尋歸舟萍蓬蹤跡本無定使我感慨增離憂
一片孤帆向何處日落雲橫廣陵樹天姥峰前送月明
姑蘇臺畔聽鴻度江煙慘淡江艸青衆賓沽酒雙玉瓶
別君惆悵不忍去碧雲回首天冥冥

觀古壁畫山水歌

危樓百尺凌空起古壁丹青畫山水淨掃浮埃據榻觀
筆跡何人乃能爾想當盤礴時巧思妙入神胷中羅萬
象寫出皆天真迴峰疊嶂開嶙峋白波浩蕩渺無垠仙

人宮闕擁出碧雲裏宛如三山隔水無通津松間白鶴
呼不下却思整翮凌蒼旻超然風景異人世四時花木
相鮮新溪林冥密碧艸合又如花源有路通秦人蒼茫
遠勢尤莫測渤澥崑崙看咫尺一葉漁舟歸未歸洞庭
秋淨湘煙碧野橋沙岸曲徑通高樹下有長髯翁恍如
著我圖画中手攜雲鏡倚青松萬籟不起千山空仰天
一嘯看飛鴻

青田溪上

月出高峰潮上灘叮嚀舟子放舟還蒲帆不掛春流急
又過前溪白鷺灣

陳體文

五首

體文字仲約號寄委江陰學生有友錄橐

劉應谷云寄委

詩靡有承襲成一家言

詩話仲約早辟學官肆志詩律築耕舍於郊西有田數十畝力耕而食
賓至必治酒酒酣賦詩詩有云得魚便覓酒有酒且留人如此即為樂
何須復苦貧無魚亦無酒宜主不宜賓如此即高臥何愁不及晨可謂
達生之士矣平居詩不留草其友花左室見輒手錄之故名友錄橐五
言不為舊格所拘頗自超脫是時五岳十岳諸山人率以章布放縉紳語未免可憎菰蘆中有此人大是不俗

雜詩

三首

林間慈烏鳥哺母聲嗚嗚城上雙鷗裊破巢還啄雛
鷹飽食肉勁翻翻平蕪不擊城上鷗但擊林間鳥
漢家有通儒窮經三十年腰下鮮尺組囊中無一錢出
門逢高車呵者當其前問之彼為誰牧兒新助邊
明鏡不在遠妝臺當目前只言他人媿長謂自己妍人

亦不能別鏡亦不能宣遂使效顰子翻希惑者憐

三月晦日作

造化如驅車春歸一何早本為天地客又復客中老榮華已潛奪安得顏色好君看庭下花開者行當掃

宴起

老覺春無賴朝來起最慵烏聲殘夢裏花氣宿醒中樓日連城下池風過苑通却悲寒食節歲歲客江東

王 襪 一首

襪字宗順泰州安豐場人處士良仲子自號天

南逸叟有東崖遺集

詩話東崖隨父心齋之會稽傳陽明良知之學吳興沈桐贈之詩云念子賢者後至理早已融譬彼三世醫指授寧無從詩其餘事然如一室

風過雨三更月到窗好雨應宜早秋花不恨遲坐雨新亭曉聞潮落月時老攜杖屢歸山谷間看兒孫種水田亦有活脫之趣

漫成

青春去何速白髮將奈何豈乏大藥資而不棲巖阿擾擾苦勞生所得諒無多古人貴聞道道在焉問他

岳 岱 一首

岱字東伯蘇州衛人有漳餘子集

詩話東伯集交友詩為今雨瑤華猶存次山篋中遺意

征南

安南易姓舊相因封賜還應到海濱萬里版圖曾郡邑殊方小醜亦君臣炎風毒霧煩諸將翠羽明珠入紫宸想見乞降矜面縛天威此日轉陽春

方學漸 一首

學漸字達卿桐城人貢生有連理堂集

詩話方氏門才之盛甲於皖口明善先生寔濬其源東南學者推為職志焉如東征句云豈謂憑陵愁日本至勤師旅出中原宛然空同華野

白雲巖

磴道斜飛瀑巖花半入雲望中孤鳥沒天外一江分竹
柏山樓色旃檀石鼎熏軒然長嘯發清興好誰聞

方學箕 一首

學箕字紹卿學漸從弟有卷石山房藁

劉慎吾贈石

怪石從何得玲瓏自可憐感君同白壁置我小窗前

張士淪 一首

士淪字心父崑山人有張氏集

送人還京

臨岐一別酒惆悵故人違落葉雨中滿歸舟江上稀路
將天欲遠帆逐燕同飛去去還鄉樂無勞淚濕衣

陳鳳 三首

鳳字羽伯更字鳴岐無錫人有石邨藁 穆敬甫云山人不務

奇詭而意象悠然

詩話明詩人同姓名者甚夥然猶世代相去字里未同至金陵陳鳳字羽伯梁谿陳鳳亦字羽伯兩君詩皆平平既無春城寒食之作可別韓翃始猶兩存終愁兩湮沒耳

春夜阻舟尤村渡華子攜酒見訪

盤谷春雲覆竹扉
夜船燈火宿霏微
故人何意一尊共
野渡不堪孤鴈飛
世路波濤渾不定
客程風雨竟誰依
重來應待晴芳好
柳絮桃花滿釣磯

宿尤邨渡同李思齊

寒煙蒼蒼溪路昏
月出斷岸溪光分
孤舟畏險不復渡
兩人對酌皆成醺
苦憐白日易華髮
所喜青天無片雲
櫂歌漁父杳然去
縱橫野水蘆花村

雨中客至

新水柴門漲碧沙
孤邨煙樹隱漁家
客來湖上偏逢雨
春到江南又見花
沽酒隔鄰傳小甕
打魚深夜出枯槎
浮生莫遣浮名誤
醉裏還驚兩鬢華

朱察卿

四首

察卿字邦憲松江華亭人有朱邦憲集

荆軻

匕首無功壯士醜
函封可惜將軍首
秦廷一死謝田光
社稷何曾計存否
不知秦王環柱時
舞陽在前何所爲
當時太子不早遣
待客俱來事未知

對簿詩

日出雪不消天寒日亦冷
蕭蕭枯楊下危墻
見人影對簿慚予來公門日
延頸囚服僮僕嗤囊空
吏徒屏懷刑媿君子惡慝時
自省嗟彼羣凶心持石待下井

雨中感懷

春雨久不歇春寒戀衣裳駟馬斷委巷蝸牛蠹空墻臥
讀感舊篇惻惻各悲傷人生貴適意所就何短長屠狗
足成名秦龍終亦亡虎韉腐泥沙繭絲成文章物理有
盈虧人情空較量不如典春衣沽酒澆吾腸

江南

江南千里暗妖氛野哭家家不可聞落日羣狐窺白骨
荒林萬馬臥黃雲將軍不下征夷令使客空傳祭海文
試問九重宵旰處殿頭香氣正氤氳

吳

擴二首

擴字子充崑山人有長吟閣棗貞素堂集

謝茂秦云子充

吐詞新麗不減唐人

詩話子充游大人以成名嘗於元日賦詩懷分宜閣老其友聞之笑曰曆頭第一日懷中朝第一品官循是懷人即歲除亦輪不到吾輩此可入啓顏錄嘉靖間山人若呂中甫謝茂秦之徒排難報恩不無可取若子充所謂斗筭之人無足算也

懷伯兄

老至無家別飄零何處邊音書嘗不定生死竟誰傳朔
鴈驚秋思陰蟲攪夜眠空庭孤月下顧影一潛然

漂母祠

賢哉一飯恩千載猶廟食如何漢諸陵寂寞生荆棘

鄭玄撫

一首

玄撫字思祈歙縣人有梧野集

折楊柳

孃孃河堤柳年年送別離攀條不忍折拭淚強相持弱

態君應惜柔情妾自知春來愁幾許試看向南枝

汪寬一首

寬字子敬祁門人

鸚鵡

被寵翻遭繫能言太逼真主恩非不厚野性詎能馴去國長憐爾呼名輒應人江南盛雲木何似隴山春

邵正己一首

正己字格之休寧人有玄石山房艸

詩話格之專精墨務詩亦斐然

銅雀臺

寂寂銅雀望飄飄總帳懸君王遺令日是妾斷腸年舞

影傷羅綺歌聲咽管絃西陵松檟冷日夕鎖寒煙

吳錦一首

錦字有中休寧人有吳有中詩集

送金伯謙北行

浮雲西北征客心渾不住到日屬秋深寒生灞陵樹

吳瑗一首

瑗字子欽歙人

采蓮曲二首

泚泚蘭橈鳴雙雙屬玉起不見采蓮人知在蓮花裏
采得雙蓮蓬中有百蓮子一一自生心外面空相似

吳瓊二首

瓊字邦珍休寧人有紫芝社稟

歲暮書事

海上猶多壘江東未息兵如何觀察使遠報武功成寒
沍凝春令陰霾蔽日明不堪黃浦路雞犬寂無聲

旅邸除夕

老至謀仍拙天寒酒易消冰霜愁裏過鄉國夢中遙一
歲祇今夜百年能幾宵病懷堪自遣無復歎蕭條

葉一清

一清字本靜祁門人

王仲房云本靜詩格
稍落而意旨融洽

遣興

頗怪逢迎懶經旬不出谿艸堂一夜雨新漲忽平堤翠

篠吟風細青霞壓樹低滄洲意不淺獨坐領鳧鷖

汪少廉

少廉字古矜休寧人有汪山人集

邊憤

漠南在昔王庭少內地而今戍鼓多何將突營騎白馬
先朝失計割紅螺虛令互市通蕃貢翻遣降王解漢歌
獨喜郭侯曾一戰十年瀚海不揚波

程 柘

柘字來周休寧人大石山人稟

東原

翠竹孤村合黃花曲逕饒租完無吏過酒熟有鄰招碧

澗當門釣青山隔岸樵自慚非世用長得任逍遙

戴 嚙一首

嚙字子京休寧人

得子秀兄避寇消息

問訊東吳使秋來尚避兵一身依短劔數口傍孤城旅
食應無定歸舟未有程此時正愁絕天末斷鴻鳴

程天符一首

天符字夢甫婺源人

飲酒

昨非未皆非今是未皆是是非皆茫昧寧知譽與毀毀
于我何悲譽于我何喜時對無極翁翛然鳴綠綺

張應文一首

應文字茂實蘇州嘉定人有巢居小橐

食新米作

人生欲無涯各各饜梁肉吾獨薄滋味一飽但饘粥屏
居事躬耕辛苦踰三伏瀰瀰白露滋粟粟香稻熟滌我
碌礪場納之杼與柚揚糠已隨風漬水乍離篔欣欣婦
子語足比玉田玉力穡斯有秋薦廟乃嘗穀先民戒肯
播老氏尚實腹感彼桑田巫食新詎非福

張應武一首

應武字茂仁蘇州嘉定人有文起齋集

郊居雜言

屏居予西郊學圃予躬稼岸峯峯予似山水云云予遠
舍烏嚶嚶予鳴春草萋萋以迎夏芳菲予及時有美不
來予徂謝念我同學予結珮拖紳紛車馬予要津尊魚
懷予未得獲鶴怨予無人曷歸來予郊西劃松竹予爲
鄰晨耕予午饁作盛世之逸民

張鑾 一首

鑾字顯文萬載人多善行年九十三舉鄉飲大
賓壽百有七歲而卒

百歲作

石田茅屋野人家百番春風換歲華盡道長生緣辟穀
不知香飯有胡麻

范如珪 一首

如珪字文瑞休寧人

江上

江上西風雨復晴菰蒲深處釣絲輕何人隔岸吹長笛
楊柳秋江一夜生

孫良器 一首

良器字貢甫休寧人有九野橐
王仲房云貢甫詩才清
思暢言簡意微過姑蘇

過姑蘇有感

東吳城外盡烽煙百姓流移半在船為問秋風舊來鴈
稻梁今剩幾家田

鄭孔庶 一首

孔庶字子富歙人

雪後東張碧川

吳橋殘雪漲新痕客舍無人閣酒尊不為寒梅覓春信
東風長日不開門

葉杲 一首

杲字杲卿休寧人

旅次江夏

歲暮投南楚蕭然一旅身江山遙對酒鄉里少逢人細
柳舒殘臘疎梅報早春故園歸未得物候條更新

汪子祐 二首

子祐字受夫祁門人有石西集 吳園次云石西詞博而昌調清而越

貧病

夜讀朝慵起晨餐午未炊邇來貧亦樂真與病相宜過
受三彭錄游憑二仲隨科頭忘日暮倚杖步雲遲

獨行

日杲秋猶暑林棲鬚欲華獨行銷白晝得意見黃花稻
熟莖莖穗薑肥寸寸芽竹堤香漸近水次有漁家

李敏 一首

敏字功甫休寧人有浮丘山人集

發盤塘

朝發盤塘均夕望平陽郭江空雨冥冥無風客帆落

郭 第一首

第字次甫丹徒人隱於焦山嘗為嵩岱游有廣

篇

何元朗云次甫江月不可留山雲坐相失之句駸駸窺盛唐之室

錢塘雨泊

一片迎潮雨錢塘泊岸逢煙明六和塔雲暗兩高峰茶
熟蓬窗火香殘野寺鐘湖頭舊游路濕翠想高松

陸九州 二首

九州字一之無錫人

荆溪

東風靜卷游絲長桃花吹落流水香美人照水芙蓉裳
蘭橈玉腕擊波去欲來不來空斷腸

鍾廣漢云語皆前人已道者而其章法却合唐音

半山

山深翠微寒飛花亂如雨輕風抽布帆落日在高樹

張文介 四首

文介字惟守龍游人有少谷集

湖上晚興

日夕湖水佳波光皎如雪沿堤蹋花去獨行自怡悅浮
香時有無流螢乍明滅興盡櫂歸舟山齋照涼月

九日風雨登吳山亭子

今日復九日自憐猶未還巖亭足佳菊風雨亦躋攀漠
漠煙中寺冥冥海上山鄉園渺何處空佇白雲間

遣懷

一水斜通棧羣山曲抱城短簷殘雪色遠寺暮鍾聲茅
屋仍加稅天河未洗兵空懷太平策誰問魯狂生

吳江舟中

向夕問舟人吳江將至否須傍微月中繫船好沽酒

王應辰一首

應辰永嘉人

夜遊曲

燕舞起香塵鶯歌出絳脣直須滅銀燭恐有絕纓人

趙綱二首

綱字希大無錫人

黃勉之云希大寄李秀才二十字入唐人詩中未易辨也

黃燾車

楚人拒滎陽漢事日以亟絳灌亦何為相顧徒失色紀
生何雄哉毛骨無所惜黃燾甘自焚赤龍乃得出如何
垓下平其功竟淪沒

寄雒陽李秀才

未得吳公薦空憐賈誼才年年三月裏相憶看花來

朱陽仲一首

陽仲以字行失其名遂寧人有青城山人集李時

遠云文學詩聲調
意境絕類中唐

金溪曲呈方使君

金溪流水發新安一片孤帆兩岸山估客自吹龍女笛
路人遙指玉郎灘

余慶一首

慶字惟德固始人貢士有障風集

送吳隱君南還

可歎論交日翻成餞別時空江憐歲晚遠道念歸遲行
色關鴻雁鄉心挂柳枝殷勤一杯酒相勸復相思

邊習一首

習字仲學歷城人尚書貢仲子有睡足軒詩集

王貽上云弘正四傑惟何氏之後最大李氏次之徐氏有子伯虬稱詩
吳中名載今兩瑤華而仲子以尚書之肯食貧授徒有遺藁一卷薄暑
不成雨夕陽開
晚晴其佳句也

雨止

訪舊歸來夕照中半天涼雨一溪風須臾雨盡浮雲斂

笑看兒童指蝶螿

禹龍一首

龍字子化揚州興化人

九日登高

佳辰何事恨相仍萬里高臺醉復登淮海煙塵迷客路
濠梁烽火照皇陵牙旗分闡原非將羽檄徵兵却到僧
遂使英雄增激烈不堪遲暮欲飛騰

官一夔一首

一夔字舜鳴平度州人官府同知有少泉詩集

九日

獨有幽懷客逢秋感慨深菊荒三徑雨荷老半池陰歲

月人間世神仙病後心北山高興在殊未罷登臨

張墾一首

墾字禹卿南昌人生員有白榆園橐

送仲逸同懋功太守遊滇池

滇南西去在天涯匹馬先看楚地花但有故人嚴僕射
杜陵隨處即為家

陸光宙一首

光宙字與嘗平湖人有鉏餘橐

詩話與嘗隱居郊園與宗旭初賜瑋之璞若瑕輩一十八人結文酒之社晚夢一道士持陶靖節小像索題詩視之即已也題云在晉為淵明躬耕辭五斗昔以節自持今惟義自守千載復歸來春風吹五柳曾識白蓮人遠公是吾友蓋十八人中有白蓮道人如木也翌日復作偈言投筆而逝鄉之遺老至今傳之

歸燕

萬里衡陽雁春來又北征誰憐失羣影故作斷腸聲
朔漠風猶勁關山月自明素書吾欲寄須到雒陽城

姚堯二首

堯字叔信秀水人有玄岳山人詩集

王伯穀云山人詩清真古澹不

興善寺訪威希仲養疴西林禪房限韻

橋分龍藏北水接馬涇西一棹通祇苑孤筇引曲堤
梅同殘雪映竹覆濕雲低不淺陶潛興清尊許共攜

寄懷朱宗魯太醫

憶昔都城醉故人睽攜二十四迴春心隨明月長飛夢

目斷停雲欲愴神藏室書成周柱史丹箴筆記漢宮臣
何時得副還山望芝艸瑯玕共采真

詩話此贈先少保作也少保保御三朝曾撰太醫院志定陵親政後醫或進以金石劑起居未安先公入視疾奏曰聖體病在肝腎宜寬平以養氣安靜以益精帝喜命大璫陸敬書之屏斯叔信詩有丹箴句也

戴乾一首

乾字元泉桐城人嘉靖中處士

述古

英雄一身存安有仇不報覆楚與復楚各不出所料後
此博浪椎報仇志未了進為漢廷傑退借赤松老成功
匪所期封留豈足道

鄭坤一首

坤字順卿吳縣人有石南集俞汝成云順卿詩賦有蕭散清逸之風

同王駕部遊慧山題秋聲小閣

輞川居士共襟期小閣登攀欲暮時山色可淹今日酒
秋聲還憶去年詩聞雲竹掃無留影老樹藤纏不剩枝
景物慚隨人事謝隔窗幽鳥未曾知

張虞卿一首

虞卿順天人

雜詩

青青江上艸關關洲中禽物類各有待因時樂相尋嗟
予久漂泊感遇情難任豈無他人好咸非心所欽所思
在遠道關河阻重深寒暑屢變節魚鳥空浮沉離憂共

誰語強坐彈鳴琴孤鸞與別鶴此曲傷人心

王叔承 十四首

叔承初名光循以字行更字承父晚更字子幻

吳江人有吳越遊閩遊楚遊嶽遊諸集

詩話承父才情奔逸下筆不能自休其論詩不甚傾心王李大指謂事與景者天地所自有之物偶遇而收之情與意者吾所本有之物偶觸而發之彼吾役也吾不彼役也斯言良是惜其所作牽率者什九王元美序之稱其句就而色自傳篇就而用恒有餘驟讀之恍然若新既諷之而又恍然若故王敬美序之稱其能以牛溲馬勃為藥傾嘻笑怒罵為文章蓋皆寓貶于褒之辭而承父自負其才受元美之籠絡不覺也平情而論承父亦安能敵元美即就宮詞百首而觀已遠出元美之下特其卷帙繁富不減弁州詩部爾當嘉隆間布衣稱詩若沈嘉則王伯穀及承父三人咸以多勝人今歷年未久全集流傳日寡後世誰相知為重刊其詩者豈惟重刊覽其全集而不欠伸思臥者亦稀矣奚以多為

將渡江訪戚世秀阻風雲陽道中作

大江何茫茫晨風颭已夕故人如浮雲可望不可即有
夢亦須臾寤言轉悽惻生別時易徂一日三秋隔袖中
懷素書零落餘紙墨區區方寸心相看皎猶昔

自桐廬入七里瀧出嚴州舟中懷古

入瀧還出瀧宛轉千盤經既登桐君廬復憩嚴子亭水
光鴨頭綠山色蛾眉青雲中雞犬隔天際鸞鶴停往往
至人宅選勝開巖垆舊壇秘光彩遺廟虛精靈朱鳥不
可見哀歌許誰聽

題陳從訓所藏惠崇溪山春霽圖卷

惠崇一詩僧宋首柴周尾丹青入禪觀別自通玄理能
於尺素間點染千山水昨登金焦興不孤陳郎示我溪

山圖画家精工多近俗寫意得神形不足此僧妙趣種
種兼不滿三尺吳興繡針頭毫末密相接有如蠅螟寄
蚊睫或言工勝趙大年又云妙超展子虔只須三日坐
其下一花一草生意全乃知陳郎揮灑信有本恥與當
今画家混我歌長句君莫嗤惠崇惠崇郎所師

水北菴醉歸書興

水深肥紫蟹稻熟美黃雞溪饌秋來賤酒人閑處齊醉
歸廬嶽社惱殺太常妻點檢明朝約野橋煙樹西

屯溪乘竹筏抵紋溪作

綠竹揚輕筏屯溪渡早暉魚梁羣鷺下石碓亂泉飛小
市環青巖長橋跨翠微前峰仙路近樹色滿秋衣

金陵豔曲

綠江天作塹翠嶺石為城柳暗黃金塢花明白玉京春
風十萬戶戶戶有啼鶯

揚州歌 二首

二十四橋邊當壚最可憐妝成窺客坐不耐數青錢
東家女十三西家女十五夜半褰娘啼嫁與并州估

益卿簡寄家兄酒錢志感

異姓憐兄弟天涯寄酒錢急難那得汝我媿鵲鴿篇

觀音巖訊蘇道人適山頭虎過

層巖飛茗煙道人正高坐牧童折山花笑指神虎過

西湖雜興

看花須近寒食看潮待過中秋二月十五花信八月十八潮頭

荆溪雜曲 二首

賣殘竹菌筍還來收罷蘭花蕙又開但焙茶芽先穀雨不愁虎跡遍莓苔

蜀山山下火開窰青竹生煙翠石銷笑問山娃燒酒杓砂坏可得似椰瓢

竹枝詞

白鹽出井火燒畚女子行商男作家橦布紅衫來換米滿頭都插杜鵑花

黃姬水 一首

姬水字淳父長洲人省曾子有白下高素二集

王元美云黃淳父如比里名姬作酒糾才色既自可觀時出俊語

送汪太學遊江都

千里王孫歸未能風雲意氣每超騰年來裘馬遨遊處不是金陵即廣陵

王穉登 十二首

穉登字百穀一字伯固長洲人國子監生有晉陵金昌燕市客越青雀竹箭梅花什荆溪松壇

諸集

詩話伯穀詩亦華整第嫌肉勝於骨至袁文榮所賞色借相公袍上紫書生薄命原同妾等句嬉竈之詞近於卑田乞兒語矣虞山錢氏甄錄太繁予刪其什九而風骨始刻露嘗鼎一臠未為不知味也

送吳郎遊金陵

兩地三春別孤帆千里愁君今遊帝里誰與共仙舟夜
雨連瓜步春潮滿石頭長干管絃地走馬莫淹留

送慧師還五井兼懷其故師楊伯翼

持鉢南歸去長天接遠汀未霜吳樹赤過雨越山青帆
外桃花渡函中貝葉經還將二泉水一酌子雲亭

婁東訪顧靖甫

訪爾山城下秋風一徑偏溪魚名箭鏃野菊類金錢艸
廢歸吳宅潮通入楚船馬鞍峰頂石把酒憶當年

看梅過玄墓山中

橋外花開日分明雪作圖不將他樹雜未有一家無多

處半青嶂香時過太湖濁醪元易得市遠亦須沽

送吳中丞之金陵

建業青山是帝都蹙勞開府握軍符花間朱鷺鏡歌曲
江上黃龍水陣圖玉節中丞新盪寇樓船諸將舊平吳
不知燕子磯前地容得陳琳艸檄無

邊警

琵琶洲上香山澳來往初通海上艦漸習文書通漢語
別居城郭慕中華餘甘却載西商舶吉貝先歸市令家
島寇須防勾引漸斧柯莫待翦萌芽

長安春雪曲

春風吹雪下桑乾添得城中一夜寒鳩鵲樓高消不盡

長安街上馬頭看

都下寒食

騎馬尋春春尚遲
東風空自向人吹
燕王城裏千株柳
寒食來看未有絲

望湖亭

亭邊楊柳水邊花
落日行人正憶家
不及江南湖上寺
木蘭舟小載琵琶

湖上梅花歌 二首

山煙山雨白氤氳
梅蕊梅花濕不分
渾似高樓吹笛罷
半隨流水半為雲

虎山橋外水如煙
雨暗湖昏不繫船
此地人家無玉曆

梅花開日是新年

清明前一日慈雲菴訪怡菴上人

春風駘蕩日初晴
與客尋僧入化城
牆裏杏花牆外柳
始知佳節近清明

梁辰魚 二首

辰魚字伯龍崑山人有遠遊藁

詩話伯龍雅擅詞曲所撰江東白苧妙絕時人時邑人魏良輔能喉轉音聲始變弋陽海鹽故調為崑腔伯龍填流紗記付之王元美詩所云吳閬白面冶游兒爭唱梁郎雪擊詞是已同時又有陸九疇鄭思笠包郎郎戴梅川輩更唱迭和清詞豔曲流播人間今已百年傳奇家曲別本弋陽子弟可以改調歌之惟流紗不能同是詞家老手詩律猶未細猶能踟躕而已

登西塞山訪張志和遺跡

晚登西塞山翛然出林薄
諸峰自南來茲嶺獨岸聳攀

援上蘿磴翠微構蘭若清梵懸香林法鼓時聞作零雨
飄巖阿殘雲臥松閣緬懷玄真子雅志甘寂寞雲鴻入
冥冥孤飛避繒繳風雨湖上歸浮名寄簑笠斯人邈千
載高風滿寥廓伊余慕肥遯世故還束縛名境雖盤桓
猶未諧宿諾何時返初服於焉此棲託

夏日泛舟荆溪暮宿湖口

五月荆溪上驚湍走白沙風檣軟聽燕浪機遠衝花山
勢通吳直溪流向月斜維舟見漁火深樹有人家

秦嘉禾

二首

嘉禾字吾田桐城處士自號大龍山人有彭澤
藁

小孤山

砥柱從開闢中流自古今神龍常在窟怪木不成林絕
頂雲流影懸崖鳥過音吾題百丈壁仙跡倘相尋

汎湖

汎汎楓湖十里中薄雲細浪夜初融月明會聽雙龍起
我欲騎之到海東

汪坦

一首

坦字仲安鄞縣人國子監生有石盂集

夜上嚴灘

上灘似牽羊下灘如走馬灘高月未出亂石怒流瀉離
離巖際星風雨聲在下夜久漁火明疑是披裘者

林兆恩 一首

兆恩字谷子莆田人

詩話林谷子李卓吾閩中二異端也

題室

茫茫天地一閒身寄跡榕州今幾春日暮潮平沙欲合
隔江還有未歸人

徐 韋 二首

韋字明佩江陰人國子監生有觀夢菴集

重經故居

荒臺欹側柳凋零故里重過悵獨行燕子不來花落盡
夕陽偏傍斷橋明

過復元從孫

銀蠟風多護錦屏飛觥不逐舞腰停當筵莫唱江南曲
白髮周郎已倦聽

董宜陽 一首

宜陽字子元自號紫岡山樵上海諸生

初發谷陽夜泊追懷舊游寄袁魯望

不寐嫌宵永殘星帶月明城烏喧夜柝岸葉亂秋聲
路悲今昔存亡念友生淒涼感舊賦轉見古人情

汪 淮 一首

淮字禹又休寧人有蘿山詩橐

聞報懷族孫時元

聞道東南寇烽煙處處昏
倉皇悲客子流落向江邨
野曠雲迎陣人稀晝掩門
更誰如漂母一飯識王孫

沈

倬

五首

倬字道章吳江諸生以子琦琬珣貴累贈通奉
大夫有紀志橐

松際月

清風湖上來徐徐入松下
風吹松子落拾之欲盈把
月出松際雲清光滿籬舍

題張師清望樓

曉色臨平野高樓屬斷雲
連峰當戶入一水傍階分
樹影參差動禽聲下上聞
主人方擁傳莫草北山文

送別

空城積雨煙霧深驛亭迢遞江沉沉
桃花一樹感春流楊柳萬條驚別心
燕趙古來多結客秦淮道上誰知音
丈夫意氣偶相得脫贈豈惜雙南金

月夜

明月吐夜光寒影在溪水
山人抱琴來坐久秋雲起

花溪客舍

孤燈坐來昏淒其不成宿
夜鶴忽驚栖翻飛入修竹

卓明卿

一首

明卿字徵甫仁和人以太學生選授光祿寺署

丞有集

葉茂長云徵甫詩華
膽和暢才調過人

江上別黎惟敬

執手河橋上，遙天起片雲。仙帆千里發，客路一江分。桂嶺先秋色，樟亭半夕曛。家山到何日，兩地惜離羣。

陳九州 一首

九州字維同，江陰縣學生。

夜泊荆溪

細柳湖邊岸，青蒲水上舟。星隨孤月動，山入暝煙收。鼓柁聞漁浦，懸燈見佛樓。客途春欲盡，歸思滿滄洲。

王逢年 一首

逢年字舜華，初名治，字明佐，崑山人，同祖之子。

諸生有海岱集 王元美云明佐錄麗宏博纒纒不竭

秋曉聞鴈

北斗橫天秋夜闌，朔雲遙度鴈聲寒。夢回旅館燈初落，書寄衡陽葉未殘。隱隱斷行迷極浦，蒼蒼斜月帶長安。湘南塞北關情遠，人倚青樓幾處看。

汪時元 一首

時元字惟一，休寧人。

九日舟中

秋風葉正飛，江上逢重九。人世幾登高，寂寞黃花酒。 周青

士云詩有不必深言而選家必錄者此作是也

袁景休 三首

景休字孟逸，吳縣人。

詩話孟逸隱於卜肆歿後閩人林古度寫法水寺見孟逸夫婦停棺于寺傷其無子取摺疊扇畫兩棺貯破屋中上雨旁風極悽慘之狀題詩其上有新安客見而憫之出私錢庇窆古度又口授遺詩刻之成集余購之不得繡谷蔣氏藏孟逸墨蹟五翻凡十絕句亟錄三首孟逸風見知於沈嘉則其送嘉則詩云道上霜寒連白鴈馬頭木落見黃河殊有爽氣宜其訕笑詆諆及劉子威侍御也

入慧慶寺

新秋入古寺涼氣何清越樹杪夕陽微山蟬鳴不歇

春日過南城

黃鳥當三月城南景正繁桃花千萬樹不異武陵源

自江村望虎丘

茲山奇且麗迥與江村合幽人去復來斜陽在孤塔

王受甫 一首

不知何許人詩載袁中道游居錄

題九山壁

一心貪與白雲期解帶歸來任所之每過名山經月住

蘇門山上更多時

素小修云九山去輝縣十里上有斧劈石石上題詩後云嘉靖癸卯受甫不知何人

明詩綜卷五十

明詩綜卷五十一

小長蘆 朱彝尊 錄

廣陵 楊文鐸 緝評

羅萬化 一首

萬化字一甫會稽人隆慶戊辰賜進士第一歷

官禮部尚書贈太子少保謚文懿有世澤編

靜志居詩話唐宋科目繁多至明而始終所重惟甲第志科名盛事者首述吉水蒲陽而於越山陰自諸文懿大綬而後榜五發邑人居其三焉傳聞三公俱同席硯之友不可謂非盛事已

擬此日不再得

落景無返輪奔星少回光綠髮不戀人轉眼化為蒼所以志士心努力及方剛恒恐歲遲暮蘭蕙不得芳膏火

還自煎山木亦自戕我謀一以乖終身失其臧大道本
希聲至人貴含章豈其魚目珍而登君子堂登高豈無
梯濟深豈無航愚者貴速至聖人寶其常虛牖展素書
古人未云亡無為守躊躇徒貽過時傷

黃鳳翔

三首

鳳翔字儀廷晉江人隆慶戊辰賜進士第二歷
官南京禮部尚書贈太子少保謚文簡有田亭

草

告歸發潞河作

方朔恒苦飢相如常病渴明時許乞身初衣薜魏闕革
車逐扁舟長河接溟渤舳艫爭唱呼鷗鷺閒出沒帆影
日外落棹歌津頭歇舉酒酬暮雲卷簾對夜月悠然萬
里心頓與江天豁

穆宗莊皇帝發引挽歌

垂衣方在御憑几那堪聞雨暗虞淵日星沉華渚雲周
宮開翼室漢曲罷橫汾百辟趨蹌地傷心望紫氛

萬曆宮詞

霜毛鸚鵡傍雕闌巧舌依人似結歡白髮宮娃空墮淚
先皇覓到不曾看

趙志皋

二首

志皋字汝邁蘭谿人隆慶戊辰賜進士第三歷
官少傅兼太子太傅吏部尚書建極殿大學士

贈太傅謚文懿有潑陽詩集

早發錢塘

曉霧兼天白秋風一葦輕湖吞漁浦闊沙湧固陵平隔
座吳山送揚帆越嶠迎蒼茫思無限天外忽鐘聲

贈太僕何石川

丈人三徑傍城隈不厭鄰翁日日來雙鶴竹間迎客舞
一尊池上為誰開采芝合共商山老作賦仍多洛社才
自笑登樓倦懷土暮天回首重徘徊

王家屏

六首

家屏字忠伯大同山陰人隆慶戊辰進士歷官
禮部尚書文淵閣大學士贈少保謚文端有復

宿山房集

詩話宋制祖宗翰墨儲藏於玉堂之署觀陳駸中興館閣前後錄道君
墨跡俱存此康譽之得題年年花鳥無窮恨盡在蒼梧夕照中之句也
迨元而奎章宣文之閣舊典不改明則藏之內詞臣未由觀矣萬曆
九年帝御文華殿宣召入直史臣五人文端居首其餘修撰則沈公懋
孝張公元忭編修則劉公元震鄧公以讚也既進見示以景陵御筆玄
兔圖圍以淡墨作滿月胎上有桂子垂枝下藉輦艸兔居其中並臻妙
境諭諸臣題詩於軸并得用私印識之閱三日詩成進御自首輔張文
忠外凡三十有五人當日諷詠優游不事促迫綵花銀葉賜予便蕃自
永宣以來詞林盛事過此罕矣長陵四馬詩世傳為江陵作今從館課
集本正之文端立朝侃侃不阿因一諫官力爭去位風節固不可及詩
亦雍容和雅不
失正始之音

恭題文皇帝四駿圖

龍駒 鄭村壩大戰胸著一箭都指揮丑丑拔

箭

天馬徠翼飛龍蹄削玉耳垂筒碧月懸雙頰明星貫兩

曠文皇將士盡羆虎復有龍駒助神武流矢當胸戰不休
汗溝血點桃花雨壩上摧鋒第一功策勲何必滅元戎
君不見虎士標題麟閣裏龍駒亦入畫圖中

赤兔 白溝河大戰胸著一箭都指揮亞失帖

木拔箭

雷鎬鎬北軍來赤兔走黃雲開攬身超夾澗策足絕浮埃
白溝原頭振鞞鼓貫陳穿營猛如虎穆王八駿詎爲奇
昭陵六馬應難數百戰間關未解鞍箭瘢還向畫圖看
只今四海昇平日誰識當年締造難

棗騮 小河大戰著兩箭胸一箭後右曲池

箭安順侯脫火赤拔箭

紫騮馬金駱月朝刷燕晡秣越倣儻精權奇超驤走滅
沒當年萬馬盡騰空就中紫騮尤最雄戰罷不知身著
箭飛來祇覺足生風北風獵獵吹原野長河水澌血流
赭誰言百萬倒戈中猶有彎弧射鈎者

黃馬 靈璧縣大戰後右曲池著一箭指揮鷄

兒拔箭

軒后興應龍翔駕天駟乘飛黃迴頭看紫鷲顧影失超
光君王神武古來少萬里煙塵一劔掃馬蹄蹴處山爲
摧何論陳暉與平保揚鞭渡淮淮水清金陵父老壺漿
迎從此華陽休駿足山河重整泰階平

初入翰林自述

生平未知學世路方多岐古人已不作古道猶可追願
言對青簡澹慮澄玄思宇宙皆吾事一念安可欺譬彼
機中素皎潔防其緇譬彼山下石孤貞堅自持文章乃
末技富貴非吾期出入感榮邁朝夕承師資遠心在霄
漢努力酬明時

玉河新柳

水繞沙隄曲春看御柳眠柔條輕著雨嫩葉暗抽煙影
落波間細陰垂檻外偏亭亭依漢苑遲日待鶯遷

沈一貫一首

一貫字肩吾鄞人隆慶戊辰進士歷官少師兼
太子太師吏部尚書中極殿大學士謚文恭有

喙鳴集

望西城宮殿

奠殿重開寶曆春竹宮長鎖屬車塵煙霞自護祈年閣
星斗曾傳醮夜辰帳裏流蘇間甲乙爐中寒火憶庚申
茂陵松柏蕭蕭老無復相如賦大人

朱賡一首

賡字少欽紹興山陰人隆慶戊辰進士歷官少
保兼太子太保吏部尚書文華殿大學士贈太
保加贈太傅謚文懿有集

詩話明制閣臣始入東閣次進文淵閣武英殿謹身華蓋後為建極中
極獨虛文華殿不拜惟永樂間權謹以孝行拜斯殿學士此後則文懿
公也是時定陵有意爰立二人先太傅文恪公暨馮文敏琦也蛟門閣
老丞以密揭止帝曰此二臣皆美器當老其才用之乃改命文懿及文

懿入賚捧各官爭論礦稅難以裁答於是相傳以政府為苦海矣文懿詩不載集中僅從館課錄得一首

薊門行

曠騎窺青海天兵出薊門白艸邊塵暗黃沙塞月昏悲
笳風外曲哽咽不堪聞

于慎行

六首

慎行字可遠更字無垢東阿人隆慶戊辰進士
選庶吉士授編修歷修撰侍講左諭德侍讀學
士陞禮部侍郎改吏部拜禮部尚書入直東閣
卒贈太子太保謚文定有穀城山房集

錢受之云公於詩文

春容宏麗一時推大手筆其論古樂府曰唐人不為古樂府是知古樂府也辭聲相雜既無從辨音節未會又難於歌故不為爾然不效其體而時假其名以達所欲言斯慕古而託焉者乎近世一二名家至乃逐句形模以追遺響則唐人所吐棄矣余間為郊祀鏡歌可數十首已而視之頗涉兒戲亦復不自了然遂焚棄之取其音節稍近者做其一謂之本調至近體歌行如唐人所假者不曰樂府則詩之而已矣夫唐人能為而不為今人能為而遂為之予奈何不能為而為也其論五言古詩曰魏晉之於五言豈非神化學之則迂矣何者意象空洞樸而不敢瑣執塗整嚴制而不敢騁少則難變多則易窮古所謂鸚鵡語不過數聲爾原本性靈極命物態洪纖明滅畢究精蘊唐果無五言古詩哉余既知其解矣而不能舍魏晉者取其可以藏拙且適所便非能遂似之也海內賞真之士有以吾言為是者吾詩雖不觀可矣公生當慶曆之世又為歷下之鄉人其所論著皆箴歷下之膏肓對病而發藥夫惟大雅卓爾不羣其是之謂乎詩話東阿格律和平當正聲微茫之時能為是調即以詩高選亦堪作相

晉陽男子行

隆慶己巳太原丈夫化為女子歌以識之

太原有男子壯烈世所無身長九尺餘白皙好眉鬚自
負良家子募作材官徒腰中鞬韠劍橫擊當路衢并州
惡少年見之伏且趨一朝覽青鏡倏空堂隅三日不
出戶忽然見彼姝綽綽芙蓉顏盈盈玉雪膚蛾眉娟且

長高髻墮馬梳脫我金鎖甲繫我繡羅襦掛我白貂帽
珥我明月珠委心懷嫵婉不惜健兒軀昔爲雲中鵠今
爲水上鳧昔者一何厲常關十石弧今者何柔曼巧笑
傾城都仰視浮雲馳變化不須更茫茫窺元運玄黃無
乃渝世人但云好不必稱丈夫

過雨

五月不知暑虛空颯似秋殘虹掛溪水片雨過城樓遠
樹斜陽駐深山夕翠流晚涼思枕簟絕愛北窗幽

秦淮

秋月秦淮岸江聲轉画橋市樓臨綺陌商女駐蘭橈雲
裏青絲騎花間碧玉簫不知桃葉水流恨幾時消

送朱養淳太史冊封周藩

蓬萊闕下五雲飛桐葉封函出帝畿漢苑花香隨使節
河橋柳色上征衣天臨玉署恩偏渥星近銀河夜更輝
試向天津橋上望銅街無處不芳菲

送張洪陽學士請告南旋

長河南下水曾波吳楚青山枕上過行到潯陽江口望
應憐秋色故園多

少年行

錦帶珠袍綠臂鞬相逢盡說富平侯南山夜獵春城晚
繫馬新豐舊酒樓

陳于陞

一首

于陞字元忠南充人隆慶戊辰進士歷官太子
太保禮部尚書文淵閣大學士贈少保謚文憲
有萬卷樓橐

宣廟御筆馬

寶繪傳神駿權奇尺素收蹄攢雙碧玉文散五花虬赤
汗當沾臆黃金為絡頭天閑今萬匹何必按圖求

張位一首

位字名誠南昌人隆慶戊辰進士改庶吉士授
編修遷司業以糾江陵奪情謫徐州同知後累
官少保兼太子太保吏部尚書武英殿大學士
謚文端有叢桂山房彙橐

詩話文端以持正忤江陵詩頗有憂危之語其詠射鵠云方寸能幾何
當此亂鏃投有感其言之也既罷相於東湖杏花村建閒雲樓吟眺自
娛晚探青原之勝汎舟螺川野服篋車登覽竟日老僧不識為宰相
題詩懷鄒魯瞻門人胡廷宴守吉安從寺壁見詩始知之是亦佳話

七夕

塞月催砧急天風襲袂深星河良夜色牛女隔年心莎
逕流螢度花陰促織吟平生江海意荏苒二毛侵

裴應章一首

應章字元闇清流人隆慶戊辰進士歷官南京
吏部尚書贈太子少保謚恭靖有嬾雲集

豐嶺即事

倚杖危峰上煙霞嶂幾重逶迤盤古道絕勝引仙蹤露
滴晴天雨雲低半嶺松蓬壺何處是天際一聲鐘

范謙一首

謙字含虛豐城人隆慶戊辰進士歷官禮部尚書贈太子少保謚文恪有雙柏堂集

初入翰林自述

聖人啓元運應龍協昌期萬物快先覩而我逢茲時抱策獻天門鴻漸修羽儀木天肆宏敞玉軸陳參差石渠發中秘虎觀探幽奇淵源接師友得失隨箴規分陰期共兢古道還力追願言謝紛華兼以息驅馳但令微忠效無求虛譽垂庶幾大造化於以酬毫釐坐見乾坤泰我亦贊無爲

習孔教一首

孔教字時甫廬陵人隆慶戊辰進士選庶吉士歷官南京吏部右侍郎

將進酒

將進酒客莫辭玉交杯金屈卮主人勸客揖且讓客言我飲本無量有如法宮置酒監在前史在後此時徑醉不及一斗州閭之會六博投壺男女雜坐盱眙歡呼爾時醉可兩壺日暮酒闌合尊促席履舄交錯杯盤狼藉羅襦襟解微聞薜澤當此時也能飲一石歛戲乎酒極則亂樂極則悲萬事盡然高陽之徒安足爲書有豐刑亦有酒誥舌出禍入君子所悼主人休矣職思其居三爵不又言毋我渝

田一儁 一首

一儁字德萬大田人隆慶戊辰進士歷官禮部左侍郎有鍾台遺藁

遲鄭郎不至

幽齋淨朝塵崇館紛晝靄涼葉陰已深疎花落猶在美人來不來搔首空相待渺渺望河干青山出雲外

韓世能 一首

世能字存良長洲人隆慶戊辰進士改庶吉士除編修歷修撰侍講右諭德陞國子祭酒南京禮部侍郎召入兼侍讀學士有雲東草

送友人南還

垂柳千條拂御溝上林春色鳳池頭如何張翰多歸興不待秋風已倦遊

沈思孝 四首

思孝字純父嘉興人隆慶戊辰進士累官都察院右都御史兼兵部侍郎贈太子少保有行成郊居西征陸沉諸藁溪山堂吾美堂等集

詩話先生封事尤觸江陵之怒杖罪即加錄鑣復下獄三日始僉解發成既抵嶺南巡撫欲殺之以矯政府遠以尺符召之行至恩平先生袖匕首示縣令曰巡撫必欲殺我我當與俱斃不然伏尸軍府中令天下士大夫皆知巡撫所殺也縣令密以告巡撫得不死蔡副使文範作壯哉行送之其歸也胡元瑞贈詩云豈翫花前千里夢梳櫛樹下十年人先生頗好鑿賞書畫言者遂劾其以千金市王右軍真蹟一卷南箕貝錦可以意成也詩入瑯琊四子之列晚交姚叟士彝未免間作齜牙語

喻邦相同俞羨長至集怒醉軒

白雲邀上客黃葉繞貧居
缸面沽來酒槎頭釣得魚
山川連越絕雞犬數秦餘
一日千秋意相看老不疎

忠家

長臥鳳城隈鄉心日夜催
小人猶有母明主漫憐才
木葉千山雨江湖八月雷
倚閭秋欲盡底事不歸來

清寧兩宮災臣督諸軍入救
上使小黃門賜以肴
四合酥與果稱是中有鳳仙橋
小紅梨佳甚乃藿
食者所未嘗敬賦此紀之

春盤分尚食天語遣黃門
橋豈維揚貢梨堪大谷論股
肱悲未竭口腹媿知恩
獨荷焦頭賞能無負至尊

出都門

天高落葉繁匹馬上東門
固寵寧臣節完名是主恩
青雲震闕迥綠野幾家存
滿筐匡時草攜歸覆酒尊

賈三近

一首

三近字德修嶧縣人隆慶戊辰進士選庶吉士
改授吏科給事中轉戶科都給事中遷太常少
卿改督四夷館歷大理左右少卿南北光祿寺
卿以右僉都御史撫保定入為大理寺卿轉兵

部右侍郎有東掖漫橐

于無垢云石葵歌詩
清爽疎宕咳唾立成

冬日登嶽

遊日高寒處羣山擁岱宗
登封迷漢艸徙倚有秦松
萬壑煙嵐合諸天紫翠重
肩輿明月下上界已聞鐘

邵 陸 一首

陸字世忠餘姚人隆慶戊辰進士改庶吉士歷
官刑部左侍郎

過拜將臺懷古

千載遺踪表故臺殘雲縹緲夕陽開三川佳麗興王地
百戰勲名大將才此日江山空草木當年壁壘半蒿萊
登臨不盡英雄恨風急寒沙過鴈哀

沈懋孝 一首

懋孝字幼真平湖人隆慶戊辰進士改庶吉士
歷南京國子司業謫兩淮鹽運司判官起河南
巡撫未任有淇林雅永

詩話晴峰樂府句摹篇傲不脫歷
下窠白餘體斐然能於同中見異

北固登望

北固樓前一笛風碧雲飛護建康宮江南二月多芳艸
春在濛濛細雨中

朱孟震 四首

孟震字秉器新淦人隆慶戊辰進士除南京刑
部主事歷郎中出知重慶府陞河南按察副使
累官通政使以右副都御史巡撫山西有郁木

生全集

任少海云使君詩閑壺瀟灑了無塵俗氣 陳于詔云秉
器才情婉附流調管發若孤桐朗玉自有天律 張助甫

云秉器詩爾雅深厚緣情達理 吳明卿云秉器負用世才以餘力為
詩諸體錯陳意匠所極才亦副之 陳玉叔云秉器詩本於才體氣高
妙

詩話乘器津津以詩家自許其在南曹結清溪社一時名士聲應氣求所緝楮談續談餘談述先詰之舊聞綜同人之麗句可謂好事也已

和答正甫

幽意苦不愜清歡良未期如何汾水上忽枉故人詩芳
草王孫路朱華帝子池相思隔年歲河漢正高垂

哭孔汝錫先生墓

殘歲龍蛇逼新阡雉兔過露隨朝槿盡風入暮蟬多坐
失千鍾酒情傷九辯歌夜臺無白日一慟欲如何

春日金沙寺訪羅孝廉元我

春水金沙是舊遊春風黃鳥况相求馬蹄一逕穿雲入
花氣千林帶雨浮詞客雄文巴蜀檄故人清興剡溪舟
草堂踪跡今猶昔好為狂夫十日留

謁張桓侯廟

英姿颯爽氣雄哉恍惚晴霄風雨來一代君臣元伯仲
千秋祠廟倚崔嵬乾坤已限三分業熊虎空懷上將才
正是雲安春月夜杜鵑啼徹不勝哀

龔勉一首

勉字子勤無錫人隆慶戊辰進士除嘉興知縣
以憂歸補吳橋知縣陞南京刑部主事轉戶部
員外進郎中出知嘉興府遷浙江叅政轉按察
使調山東遷浙江右布政使有尚友堂集

彭子殷云子勤詩整暢可方錢劉

送王會泉武庫出守永州

仙郎戎政擅才名簡命熊幡向楚城車騎舊瞻司馬節
檐帷新識使君旌九疑南接湘江遠五嶺東連粵路平
遙想行春風日好瘴煙消盡百花明

蔡文範 十首

文範字伯華瑞州新昌人隆慶戊辰進士歷官
廣東布政司叅議有縉雲齋橐甘露堂集

詩話青門近
體雄渾絕倫

自瀛德至東昌道中雜詩

聞道張秋決先朝慮獨深為山名戊巳奉使失辛壬地
控支祈鎖天寒象罔沉誰知神禹跡疏鑿本無心

岳州馮觀察見招

澹澹鋪湘水依依見武陵雲隨天不動川靜水凝冰魑
魅愁神鼎魚龍怪佛燈夜深清梵徹何異普陀僧

太和宮

疆域連秦塞星辰入楚都英靈天地啓宮闕古今無禪
艸諸儒遜玄功萬國趨祠前瞻阜燾曾說贊文謨

送庫部朱陽和備兵甘肅

陰山雪墮紫貂裘使者行邊大漠秋陝右長城班定遠
胸中武庫杜荊州風吹獵火通甌脫遂奏梅花落隴頭
哈密至今無敢論知君躍馬看吳鉤

紅心驛值雪

雪色初驕冷萬家那堪風急更迴斜來從朔北還兼雨

去到江南定結花沙上紫騮嘶不度愁邊青鬚忽先華
荒村日暮平如練破却寒光數點鴉

遊南岳 二首

縹緲仙臺紫氣浮煙籠玉座儼垂旒地包荆楚標南紀
江合沅湘向北流牲帛千秋周祀典衣冠五月舜諸侯
塵緣未斷慚仙骨金簡雲書何處求

赤帝高居小梵天衆峰羅列擁堦前秋經絕壁風雷起

有風醉倚雙臺日月懸 上有望日 誰道人騎黃鶴去我今

寒抱白雲眠莫言此夕非冲舉已隔人寰丈九千 融峰高

九千丈
有奇

寶應湖

湖闊疑無地堤長亘若虹孤舟數點雨殺却日南風

望白鶴嶺

百里初見近十里轉見遠絕頂不分明白雲時舒卷

溪漲發建陽

白日欲沒雲濛濛建陽城外雨澆空溪邊怪石不知數
一夜走入洪濤中

顧大典 三首

大典字道行吳江人隆慶戊辰進士歷官福建

提學副使謫禹州知州改開州有清音閣集

得山東觀察報留別省僚

肅肅晨風吹明星帶徂兩平生攜手俱今乃殊風壤大

江一以遠日夕春潮長憶奉南皮游良時清尊賞華篇
想遺則淵調懷餘響朋僚旣雨散世路即塵鞅去去不
可追臨風徒曠况

苕溪春日

苕溪春深春欲歸柳絲拂地梨花飛客子辭家已三月
春風初換越羅衣羅衣競試春江曲花外鶯聲斷還續
春心羈思兩相催愁見天涯春艸綠春艸年年伴客程
扁舟明日又孤征故園回首春雲隔江上春風空復情
送秦郡倅還楚中

一朝辭簿領千里返江湘棄置君何罪離群我自傷春
風過夏口秋艸臥衡陽為報南來雁音書好寄將

沈位 三首

位字道立吳江人隆慶戊辰進士改庶吉士授
檢討有柔生集

詩話虹臺詩麗以則惜不
永齡中秋結語殆成讖也

十二月二十一日獻俘

睿德通中夏天威震北隅遐方歸正朔欵塞獻新俘清
廟陳弘業彤庭顯秘圖五兵原不戰巨寇已行誅將相
多酬賞寰區盡大酺小臣叨侍從率武詠神謨

中秋

秋光長與翠華連况是中秋更可憐城闕影高雲裏見
芙蓉露冷沼中妍誰家笛弄江南曲幾處鴻飛塞北天

此夜清輝應莫負人生能見幾回圓

漁陽春望

二月春方半冷風日正長陌頭看柳色忘却在漁陽

張鏜一首

鏜號石渠吉安永豐人隆慶戊辰進士除東莞
知縣升南工部主事歷員外郎中出為湖廣按
察僉事轉貴州參議

寄艾和甫謫戍西寧

荆南偶接故人書為悉關門近起居萬里獨看營外月
孤身誰念釜中魚辭劉徐怨心元苦折檻朱雲願不虛
秦地日聽邊塞曲楚歌相和調何如

喻均四首

均字邦相新建人隆慶戊辰進士歷官天津兵
備副使有山居集

陸中丞移書促入郭有事田間詩以陳情

龐公願負耒陶令甘荷鋤外物既不干誰能逸其軀朝
夕課童僕通勉在田廬心事異昔人踪跡與之俱咄嗟
不逢年高原化為渠穡事良已矣種豆山一隅羣雀苦
交啄持竿為毆除詎意小臧來乃接中丞書要我入城
郭高義有誰如顧念山中人生事各有須寧能舍田畝
忽此升斗儲殷勤謝來意禮數寬樵漁

春暮宿大觀樓簡士功及二三知己

閒居不滿意觸事增煩憂振步出西郭登君江上樓滄
波漲初闊綠樹陰已稠煙雲綴遐岫蘭蕙盈芳洲迥覺
心迹清轉見身世浮徘徊未能去衾枕聊淹留既以自
怡悅因之報舊遊

送方子及入計

凝霜沾浦樹冉冉歲欲晏君子意如何垂老仍薄宦一
臥艾子城六見秋花綻月米分故人日食藜與覓高志
慕翔鸞卑棲託斥鷃發軔謁承明蚤晚流皇盼白首感
睽離追錢臨寒澗握手慘無言側睇雲間雁

請告書懷

夙昔浮雲意微官久欲休蹉跎身漸老丘壑願方酬海
日猶殘暑山風欲度秋盈盈河上水萬里送歸舟

方沉二首

沉字子及莆田人隆慶戊辰進士歷官雲南提
學僉事謫寧州知州有猗蘭堂橐

朱秉器云子及詩非大曆貞元以上

語不道謝山子云子及心境高妙有天然之趣

秋汎

山合松楸晚沙寒橘柚秋坐看魚鳥近歷歷鏡中遊
次長沙懷賈太傅

楚雲萬里望京華賈傅南遷路未賒誰料逐臣今更遠
春風三月過長沙

唐文燦一首

田言終卷五十一
文燦字若素漳州鎮海衛人隆慶戊辰進士除
行人歷官廣西按察僉事有鑑江亭帚集

大行皇帝輓歌

憶昔河清日流虹叶瑞徵運隨真主轉紀逐盛時蒸七
世觀新廟千秋奉永陵耿光長照耀史冊紀中興

郭

莊一首

莊字子蒞鞏昌徽州人隆慶戊辰進士改庶吉
士授山東道御史督學南畿

賦得謁帝承明廬

丈夫重意氣束髮事周遊挾策日坎壈西風吹敝裘一
朝際風雲謁帝來神州出入承明廬交結盡英流雙闕
聳雲漢朱旗夾道周翱翔供奉客錦帶佩吳鉤相期樹
勲名寧論沉與浮君看黃鵠志不為稻粱謀

帥

機一首

機字惟審臨川人隆慶戊辰進士歷官南京禮
部郎中陞思南知府謫兩浙鹽運司副遷南京
刑部郎中有膳部集

秋懷

八月金氣深蕭瑟叩虛牝梧楸半離披朱華日就隕風
急度離鴻氣嚴感飛隼皎月正舒遲義輪漸縮窘砧聲
動四鄰薄寒侵席筍清景誠足嘉惜此歲道盡况復愴
松楸欲賦思歸引

鍾庚陽

一首

庚陽字長卿秀水人隆慶戊辰進士除太平推
官入為大理評事遷工部主事歷外郎中出
知鎮江府謫知廣德州終刑部員外有焚餘集
劉在南直指遷郴州余亦謫守廣德同發潞河投
贈
繡衣使者下蘭臺愁說雙旌潞水開自是聖恩寬逐客
却從謫宦見仙才山過衡嶽孤帆轉路入瀟湘鴈影回
余亦南行賦歸去秋風天末幸追陪

唐邦佐

二首

邦佐字惟良蘭谿人隆慶戊辰進士知泰和如
皋儀真三縣入為刑部主事謫兩淮運司判官
轉贛州府通判遷知光州有比部集

感興

蟠曲惡木根不植太山岡婀娜孤生竹抽梢淇水旁佳
人好脩飾被服素羅裳感茲帛鴈會得充君子房絲蘿
引長蔓琴瑟淨高張合懽在令德容色豈足揚

塞下曲

曾隨驃騎度渾河雨雪天山夜負戈莫謂歸家貧到骨
黃沙白骨不歸多

張元忬

一首

元忬字子蓋紹興山陰人隆慶辛未賜進士第

一歷官左諭德兼侍讀有不二齋橐

杜轄巖訪吳公度

杜轄巖中人曲江舊同席未折彭澤腰早著東山屐
心老氏書結廬武夷側晴峰萬點青雲溪幾條白玄關
夾長松丹房架危壁巖頭露可餐巖下芝可摘猿鶴時
為羣車馬杳難即我本丘壑人聊作金門客煙霞夙同
好出處偶殊迹諦觀聲利場何似神仙宅四十已無聞
百年亦瞬息徒然赤松子巢居鍊形魄明發出閩嶺題
詩訂泉石

鄧以讚一首

以讚字汝德新建人隆慶辛未賜進士第三歷

官吏部右侍郎贈禮部尚書謚文潔有佚橐

思歸

星河雲氣淡萸菊露華清宦况慵兼病鄉愁斷又生
入秋偏遠夢逐日計歸程南鴈空中唳能禁此夜情

郭子章

子章字相奎泰和人隆慶辛未進士歷官都御

史巡撫貴州進兵部尚書有閩州留州蜀州浙

州晉州楚州黔州等集

詩話青螺敬歷外臺而著書不輟
詩嫌合格者少然勝於輒熟者多

紀夢

西南欖槍明占在川之播何哉井底鼃不知有漢大黔

中久愉恬崇朝忽摧挫聚黨嘯綦江一倡乃百和城市
走豸豺平原起掘堞天子赫斯怒命將出右个猥予在
田間未許支離臥馳驅竹王疆迅速等轉磨夜夢壯繆
侯車騎儼相過倒屣延之入席分賓主坐論賊無足虞
糝糠易揚簸巢幕暫偷安積薪以待莖及余入八番次
第密搜邏衝風釋乍卷利匕粉同劉豈專帷幄謀一一
神所佐從此半壁天蠻犛始退悞初祠敬事侯擊牲進
香糯誰為報侯功銘詩我所作

舟中

三春滯水濱魚鳥狎成羣江濁流新雨山晴斂薄雲村
春幽澗急岸艸夕陽薰何處城頭角偏令倦客聞

劉克正 一首

克正字懋一從化人隆慶辛未進士改庶吉士
授簡討

春雪

乍覺輕寒薄太空凍雲舞絮一宵同點成簾幕渾成雨
飛入園林不待風萬里江山春寂寞九重宮闕玉玲瓏
仙郎天下聞高調一曲誰能和郢中

郭子直 一首

子直字舜舉崇德人隆慶辛未進士除行人歷
官福建按察副使

采菱曲

采菱復采菱采采日已暮貪看馬上郎迷却花間渡

侯堯封 二首

堯封字欽之蘇州嘉定人隆慶辛未進士授刑部主事改四川道御史歷官福建參政有鐵菴遺橐

第一禪林

自是禪栖第一林萬松迴合白雲深遠看麋鹿不知數
欲問禪居何處尋中天日月遞朝暮下界山河自古今
暫憩便疑塵世隔幾人曾此一投簪

詠石牛

田入山鄉少時將孟夏終如何尚高卧不起助農功

劉元震 一首

元震字衍亨任丘人隆慶辛未進士歷官吏部左侍郎掌詹事府教習庶吉士

月下聽琴

明河澹月挂疎林此夕張君綠綺琴一曲正堪清夜聽
幾人先動故園心寒催兔杵霜前響靜愛龍脣泓下吟
流水高山意何限遙遙天路彩雲深

黃洪憲 五首

洪憲字懋忠嘉興人隆慶辛未進士改庶吉士除編修奉使朝鮮還進侍讀歷右庶子陞少詹事掌翰林院事有碧山學士集

觀蘭亭修禊圖

夙昔秉微尚，縱情寄丘壑。晞髮秦稽陽，俯觀但寥廓。蘭亭被荒丘，羣賢不能作。風生松下寒，月出雲上薄。觴咏已無歡，墨妙虛有託。崇峻迹未殊，清朗又如昨。彭殤誰見齊，庶幾達者樂。

穆宗莊皇帝輓歌 二首

祇德符神禹，成功紹帝堯。冠裳臨萬國，干羽格三苗。碧嶂龍輶入，青林鳳翼遙。淚痕消不盡，斑竹日蕭蕭。魚鑰開清禁，鑾車出紫薇。忽移丹仗去，空憶翠華歸。天路應非遠，人寰惜永違。霸陵秋色裏，愁見白雲飛。

山海關

長城古堞俯滄瀛，百二河山擁上京。銀海仙槎來漢使，玉關秋艸戍秦兵。星臨尾部雙龍合，月照平沙萬馬明。聞道遼陽飛羽急，書生急欲請長纓。

別許都監

萍水他鄉聚，多君傾蓋懽。九秋迎使節，千里送征鞍。久客歸心切，孤亭別袂寒。遠星江上落，殘月馬頭看。豈不懷瓊玖，無因託羽翰。相思不得見，努力且加餐。

劉虞夔 一首

虞夔字直卿，高平人。隆慶辛未進士，改庶吉士。歷官太常寺少卿，兼侍讀學士，掌翰林院事，再掌詹事府。

苦熱行

燕山虛傳千丈雪昔乃苦寒今苦熱苦寒尚可禦苦熱
安所逃寒有重裘奧室足自庇熱雖袒裼心煩勞炎風
吹埃沸四野火雲布空日如赭長安袞袞車馬塵驅馳
道路何為者吾思仙人乃在閨風岑水晶宮闕琪樹林
安得從之御風吟攬子之袖開我襟念此已足清人心
吁嗟炎蒸三伏無歲無發狂大叫胡為乎

周光鎬 二首

光鎬字國雍一字耿西潮陽人隆慶辛未進士
除寧波推官陞南戶部主事改吏部歷郎中出
知順慶府陞四川副使轉叅政遷陝西按察使

擢僉都御史撫寧夏入為大理寺卿有明農山
堂彙艸

大梁道上

眺望中原路逶迤入大梁風塵馳朔騎節序改青陽衛
水浮煙黑沙河落日黃愁來看短鋏猶帶薊門霜

秋懷

靈關秋色白榆多九月霜風黑水河天外雁鴻嗟阻滯
籬邊松菊怨蹉跎南來邛塞無烽燧西去臨洮走橐駝
此日三秦憂不細禁中親詔出廉頗

吳中行 一首

中行字子道武進人隆慶辛未進士改庶吉士

授編修以建言廷杖為民尋起用遷右中允歷
洗馬管司業事進侍讀有復菴集

詩話江陵奪情事在萬曆五年七月逾十月之朔彗星見大內火於是
既望三日吳公疏上次日趙檢討用賢疏上又次日艾負外穆沈主事
思孝疏上江陵怒不可止而諸公均受杖矣方杖時鄒進士元標疏復
上一時士氣持正若是許文穆以庶子充日講官為吳趙二公餞鐫玉
杯一銘曰斑斑者何下生汲英英者何蘭生氣追之琢之永成器以贈
吳公屏杯一銘曰文羊一角其理沉黜不惜剖心寧辭碎首黃流在中
為君子壽以贈趙公玉杯今不見屏者為
吾鄉何少卿雜音所得余嘗飲此作歌

賦得露凝仙掌

絳闕秋容靜金莖露氣長夜深方湛湛日出轉灩灩共
喜仙人掌能溥玉女漿願持方聖澤沾灑徧遐荒

史 鈞一首

鈞字汝和餘姚人隆慶辛未進士改庶吉士授

編修

春晴

春光二月滿皇州半逐桃花入水流何事王孫歸未得
東郊芳艸自含愁

丁元復一首

元復字見心長洲人隆慶辛未進士除知陽信
縣擢山西道御史歷浙江布政司叅議有片玉
齋存藁

早春過趙凡夫池館

幽栖何所定選勝得支硎檻底泉鳴玉天邊石作屏江
梅依磴戶谷鳥浴清泠千丈原頭瀑宜添一艸亭

鄭邦福 一首

邦福字洪疇上饒人隆慶辛未進士歷官南京太僕寺卿有采真遊橐

牛場坡

俯身牛場坡仰而臘笳嶺白鷄名山帶雨翔老鴉名關入雲

猛如穿螺竅中復躋蝸角頂行地雖數舍計天不盈頃從來汗漫遊觀茲殊絕景那知陟宦階巖嶮極無影

吳中立 二首

中立字公度浦城人隆慶辛未進士授禮部主事歸籍起尚寶司丞有吳音

浪吟

楚歌鳳兮鳳孔操麟乎麟空為世所瑞胡不全其真三山有若木百歲無故人去覓逍遙子清湘采白蘋

舟行白下

江天澹秋色斜日照孤篷漁艇沿門繫蒹葭到處通鳥飛帆影外在鏡湖中始覺煙波叟浮家趣不窮

薛夢雷 二首

夢雷字汝奮福清人隆慶辛未進士歷官雲南按察使有彩雲集

發三山

倦遊萬里欲投閒未斷塵緣更出關七十五程重屈指夢魂何處不三山

夜次弋陽

風塵何事只棲棲楚水茫茫去鳥低落日漸看人影盡
平沙如雪弋陽谿

熊敦朴 一首

敦朴字茂初內江人隆慶辛未進士改庶吉士
歷官貴州布政司叅議有謫居橐

得趙汝師太史書

章臺猶旅食珍重故人書自是飄零久非關記憶疎野
花紅更發官柳綠仍舒浩蕩乾坤意吾生總不如

馮時可 七首

時可字敏卿松江華亭人隆慶辛未進士除刑

部主事改兵部歷負外郎中出為貴州提學副

使再補四川提學副使調廣西湖廣叅政有北

征西征金閩石湖巖棲雨航等集

陳臥子云吾鄉元成可方吳門劉子威

詩話元成詩極為拔齋錢氏所詆就全集而觀甫田彌望狼莠汗萊獨五古一體尚有遺棄帶德可供摺拾以比劉子威翻覺勝之

齋居雜述 二首

兔狡能營窟鳩拙亦居巢兕虎入帝苑麒麟走空郊玉
石貌難分金錫質易淆三黜不必愚九遷豈必豪屈伸
由好惡人生在所遭鴻也費歌噫雄也費解嘲何如與
化遊小大並逍遙

白龍下清淵漁者射其目白龜使清江卜者剗其腹元
君違神夢上帝惡魚服風波一失所雲雨迷牽復芳艸

化爲芻苦菜菹爲蓄世事如轉蓬人情多反覆冉冉百
年中愁居何能淑

戊戌歸田雜感

二首

箕斗不共垣有采相爲光蘭蕙不共根有氣相爲芳奈
何同居者各自生肺腸一笑亦見疑片語含鍼鏗不能
相慰勞安望相頡頏長林知天風大埜知天霜人生不
相知何用接杯觴

北風何其涼霜霰相與期薄暮侵衆卉芳鮮漸已辭玄
髮不堪秋忽覺變青絲翩翩飛蓬征愴愴遊子思浮雲
一出山安知其所之故交皆已貴故心誰爲持酌水置
金壘焉辯澠與淄

送張孝豐

浮雲不可駐遊子不能留驚飈逐駭駟歲月去何遒禦
寒安得裘濟河安得舟客處無與懽寧不思故丘

常山道中遇雨

東山詠零雨感彼歸途事今茲賦愁霖行役我伊始霰
蠶業不堪滂沱末由止嘽嘽石彌高油油雲未已我車
淖方掀我僕顛莫起蝟蝟蠋蒸桑肅肅鵠集枳苦哉遠
征人重山復重水

建陽道中

趨程苦行遲遇景苦行速清晨發建陽重霧若雲簇載
馳且一舍始能豁我目清溪映明沙茂樹間修竹千山

開且合煙翠爭相逐飛梁若垂虹去艇如遊鶯竟日抵
甌寧應接難更僕人遠意如何良遊偏恨獨

方揚一首

揚字思善歙人隆慶辛未進士歷官杭州知府
有初菴橐

金山

虛閣疑無地琳宮別有天江空萬籟發僧定一燈懸七
澤吞吳楚孤峰自歲年乘風興不淺高眺已泠然

劉伯淵一首

伯淵字靜之號念庭慈谿人隆慶辛未進士除
泰興知縣遷工部主事歷負外郎中出為江西

按察副使以病致仕歸年百餘歲卒有灌息亭
集

詩話念庭於隆慶五年釋褐萬曆十六年即引疾歸其八十初度自嘲
詩云謂我歸田早假令不早有何好幾人欲歸不得歸黃犬東門添懊
惱謂合彈冠出陶令折腰八十日投閒已道宜休三揣分真成不堪七
及百歲思陵遣御史梁雲構存問念庭猶健步迎於門外謝恩畢騰觚
飛爵了無倦容崇禎十一年事也吳興有顯者家居以厚幣乞言
介壽念庭笑曰七十七上壽毋乃太早乎浙東西相傳以為佳話云

園居

松際茅簷隔小橋水濱穿圃亦通潮得閒獨坐翻書卷
有客相過慰寂寥方竹歲深裁作杖大壺霜落剖為瓢
年豐飽喫青精飯莫問仙山路近遙

吳丕顯一首

丕顯字希文松江華亭人隆慶丁卯舉人承天

府通判有四留軒集

詩話希文奕葉青門一官散吏廉能著聞相傳初補學官弟子製青苧布為襴衫授兄子太僕炯以及孫曾家有青苧亭至今存焉襴衫之製諸生服之洪武二十四年三易其式而後定用玉色絹布為之寬袖皂緣繫縑垂襦其後漸易以藍罕用布者矣

題襟江樓

纜解春江曉帆懸碧樹秋開窗千里月近檻一江流草色迎芳渡歌聲逐去舟十年湖海夢猶自媿沙鷗

鄭學醇 一首

學醇廣州順德人隆慶丁卯舉人選授知縣有勾漏艸

園居

藥裏供垂老幽棲性獨偏每尋高士傳無復遠遊篇柔

櫓村煙外寒江夕照前沙鷗我與汝相對可忘年

劉元卿 一首

元卿字調甫安福人隆慶庚午舉人徵授國子監博士遷禮部主事有山居草

別王以忠

王粲樓前賦梁鴻廡下居死生奚不可歸去復何如計日浮炎海經時返故廬憑將越溪水還寄八行書

梁岳 一首

岳廣州順德人隆慶庚午舉人官知州

暮春燕京懷歸

長安春盡落花多越客思歸意若何節序幾從愁裏變

明詩綜卷五十一
家園頻向夢中過
西京形勝雄三輔
北雁音書隔九河
燕市酒鑪堪取醉
莫將留滯起悲歌

明詩綜卷五十一

